

# Wedau Topura Mark

Wedau Mark

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at [dbs.org/bibles](https://dbs.org/bibles).



# Mark

## Pariverena

Wei bukana, lamna naona girumana Iesu ana nola ma ana viararamana riwana i girumi. Rava wei bukana i girumi, wavana eġa ita riweta. Wate numa-taparoro babadai wariaġai ivi araramana da Mark i girumi. Mark, tauna eġa Apasol, wate tauviararamana maġamaġai i notai da tauna, Peter maiteni au Rome i mae. Ma Peter, Iesu ana kaua ma ana viararamana maġamaġai Mark i riwei. Anina ma Mark wei riwana i girumi da tauvitu-maġana au Rome ita aramanei, Iesu aiwai i kauai.

Riwa karena i girugirumia evivi eġeta da Au baina, wei au bukana ta inainai Iesu awarina rewapana da kaua maġamaġai ita kauai. Wei kauai tana inainai maranai: evivi araramana; ma arua-apoapoei evivi aġaġana-op-unei; ma rava doridoriai evivi lawani; ma ġoa-apoapoe e notanota-tawanei. Mark, Iesu ana nola ma ana kauai i girumi ma eġa ana viararamana ita giruma guratei. Mark ivi eġeta menanare Iesu au korosi i iraġe da rava anapui itavi lawanai ma God menanare, Iesu iraġalei ivo vai-mairini.

**John Taubabataito Iesu ana aninae ivovo kaukai**  
(Mat 3:1-12; Luk 3:1-18; Jhn 1:19-28)

**1** Wei lamna *IesuKeriso* God natuna *Riwana Aiaina* karena.

<sup>2</sup> Me wariaġa *peroveta* Isaiah i girugirumia nanare: *"Ona rau-taniġana! Au peroveta au naom ana par-itawanei da am aninae inavo kaukai."*

<sup>3</sup> *"Peroveta au mutulua evivi ġoreġore: 'Taumi Bada ana aninae ona vokaukai, ana eta ona vovai-jijimani!'"*

(Mal 3:1)

<sup>4</sup> Anina ma taupariverena John i nei au mutulua da rava i bababataitoi ma God riwana i jimejime i pa, *"Ami ġoa-apoapoe onavo terei ma ona mae-taviremi God awarina ma ami ġoa-apoapoe ina nota-tawanei ma ana babataitoimi."* <sup>5</sup> Ma rava anapui *Judia* au paratana ma au *Jerusalem* i nae da John ita rau-taniġanei. Maranai ai apoapoe i rupeni, John, tau i babataitoi au waira *Jordan*.

(Isa 40:3)

<sup>6</sup> Ma John, *kamel* aparana metametanana i oteoteni ma ana tairoro ġamoġamo opina. Ana lam kapau ma manigewa. <sup>7</sup> Ma tauna, rava i ririwei i pa, *"Rava au muriu e nenei i ġetelara, eġa me tau. Eġa tagotagogiu da ana ae-uma ġuravana ana rupeni."* <sup>8</sup> Tau wairei a babataitoimi, wate tauna, Arua Vivivireinei ina babataitoimi."

**John Iesu i babataitoi**  
(Mat 3:13-17; Luk 3:21-22)

<sup>9</sup> Lamna maranaina Iesu, *Nasaret*, *Galili* i netawanei ma i nei mepa John i bababataito-lana. Ma John au waira *Jordan*, Iesu i babataitoi. <sup>10</sup> Ma maranai Iesu wairei i ġeġetai, i inana da mara i wana-tawanei <sup>†</sup> ma *Arua Vivivireina* me gabubu i ġairai ma orana ivi oai.

<sup>11</sup> Ma God ponana marei i opu ma i riwa i pa, *"Tam, tau natu au nuavaina ma uvi nuaiainiu."*

**Satan Iesu i raelari**  
(Mat 4:1-11; Luk 4:1-13)

<sup>12</sup> Ma lamna au murina God Aruana Vivivireina Iesu i paritawanana opunei au mutulua. <sup>13</sup> Ma au pom 40, Iesu au mutulua i mae. Ma *Satan*, tauna i raelari. Ġamoġamo ġaiġaiawai nai au dobuna i mamae ma God ana *anela* marei tauna i paini.

**Iesu lebalebaġai ruaġa ma ruaġa i rau-kwatuei**  
(Mat 4:12-22)

<sup>14</sup> Ma Wavalatona *Herod*, John i pani da panipani au numana i terei. <sup>††</sup> Ma muriai Iesu i nae au *Galili* da rava awarii God *Riwana Aiaina* i jime i. <sup>15</sup> Ma Iesu i ririwa i pa, *"God ana mara vinevinena i ġetai. God ana vibadana vouna rava au bai, lamna i turiai. Ami ġoa-apoapoe *ona rupeni* ma *Riwana Aiaina* onavi tumāġanei!"*

<sup>16</sup> Mara tagogi Iesu *Galili* topana au gera i bababara nae ma lebalebaġai ruaġa i inainai, Simon ma ana tev-era Andrew au topa i rarau-agida. <sup>17</sup> Iesu i riwei i pa, *"Ona nei ma onavo taġotaġoiu. Ma me marina iana o tutuarui; nanare anavi araramanimi da rava ona turui da inavi tumaġaneu!"*

<sup>18</sup> Ma maratogogi ai agida ivo terei ma Iesu ivo taġotaġoi. <sup>19</sup> Ma tau i gera i verau-nae. Iesu, *Sebidi* natunata i inainai, James ma John ai au waga ai agida wanawana-rorona ivo kaukai. <sup>20</sup> Ma maratogogi tau i ġorei, *"Taumi ona nei ma tau onavo taġotaġoiu!"* Ma tau i amai *Sebidi*<sup>‡</sup> ana taunola maiteni ivo terei ma Iesu ivo taġotaġoi.

<sup>†</sup> 1:10 Isa 64:1 <sup>††</sup> 1:14 Mrk 6:14-29 <sup>‡</sup> Eng. Zebedee.

Iesu, arua-apoapoena rava awarina ivi aḡaḡana op-  
unei  
(Luk 4:31-37)

<sup>21</sup> Iesu, ana *Tauvotaḡotaḡo* maiteni i nae au *Kape-  
naum*<sup>†</sup>. Ma au *Sabate*, Iesu i rui *pari au numana* ma  
God Riwana Aiaina, viararamanana ivi karei. <sup>22</sup> Tauna  
ana rewapanana ivi araramana eḡa me mai *Jew* ai  
*Tarawatu Babadai*<sup>††</sup> nanare. Ma tau-rautaniḡana ana  
viararamana i baei.

<sup>23</sup> Maranai Iesu pari au numana ivivi araramana ma  
oroto *arua-apoapoena* orana i rui ruinia i garara <sup>24</sup> i pa,  
“Iesu *Nasaretei*, aiwai e ḡoeḡoei awariai. Tam weka  
u nei da mavi apoapoeniai bo? Tau aramanei tam aiai.  
Tam Vivivireim Godei!”

<sup>25</sup> Ma Iesu riwa bagibaginei i riwei i pa, “Ma genuana!  
Nai orotona ma oputawaneii!”

<sup>26</sup> Ma arua-apoapoena nai orotona ivi aikwajiei ma  
ponana i rata, i garara ma i oputawaneii. <sup>27</sup> Ma rava  
anatapui i bana kauai ma tau i ava ivi tarapiri, “Wei ai-  
wai? Wei viararamana vouna ma ana rewapanana maiteni!  
Wei ravana awarina rewapanana e mamae da arua-  
apoapoena i riwei ma tauna ivovo teletelei!” <sup>28</sup> Iesu  
nolana, maratagogi i tua *Galili* au anatapuna.

Iesu rava maḡamaḡau i vi lawani  
(Mat 8:14-17; Luk 4:38-41)

<sup>29</sup> Nai marana pari au numana i oputawaneii ma ana  
tauvotaḡotaḡo maiteni i nae Simon ma Andrew ai au  
numa; James ma John maiteni i nae. <sup>30</sup> Simon poiana  
wavinena ini ḡuḡurana ana au animatave i mata-  
matave ma maranai Iesu i ḡeta ma numa ravai, tauna  
i parivereii. <sup>31</sup> Tauna i nae wavine awarina, nimana  
ivo jijini ma ivo agui da ivo mairi. Lamna maranaina,  
ini ḡuḡurana ivo terei ma wavinena, tau i paini.

<sup>32</sup> Ma au bigai madeḡa i neulai au murina, rava, ai ra-  
va doridoriai ma tau aiavo arua-apoapoei au orai  
maemae, i neiai Iesu awarina. <sup>33</sup> Ma rava anatapui nai  
au melagaina ivi tagogiei numa au metaetana. <sup>34</sup> Ma  
Iesu, maḡamaḡau ai doria nununai ivi lawani ma  
arua-apoapoe maḡamaḡau rava awari ivi aḡaḡana op-  
unei. Ma arua-apoapoena i aramanei da tauna anina  
God natuna ma lamna au baina tau i ḡaei da i genu-  
ana. <sup>††</sup>

Iesu au *Galili* i rarau-gugula  
(Luk 4:42-44)

<sup>35</sup> Ubaubanai boiboḡi, Iesu ivo mairi ma numa i op-  
utawaneii ma i nae gabu au genugenuanana. Ma kampa,  
God awarina i raupari. <sup>36</sup> Muriai, Simon varevareina

<sup>†</sup> Eng. Capernaum. <sup>††</sup> *Wariaḡa*, God ana *TARAWATU* Moses i verei  
mai Israel au bai. <sup>‡</sup> *Madeḡa* ina neulai au murina anona lauvitau  
ana mara damona. Mai Jew ai lauvitau ana mara au Friday madeḡa  
e neneulai au murina evivi karei da Saturday madeḡa e neneulai au  
murina e vorovorovei. <sup>††</sup> Iesu i aramanei, mepa da ita kauai da  
arua-apoapoei ita riwa da tauna Keriso; lamna rava tauna ita egari  
da sorodia itavi badei, me tau evivi nuanotenotei nanare. Jhn 6.15  
ma inana.

maiteni i nae da i baiei. <sup>37</sup> Ma maranai Iesu i nelaḡai,  
ma i riwei i pa, “Rava anatapui e baibaieim.”

<sup>38</sup> Iesu i paribelei i pa, “Tana nae melagai ḡelau i au  
ḡereḡere, ma kampa maiteni God *Riwana Aiaina*  
ana rau-gugulei. Tau wei lamna au baina a nei.” <sup>39</sup> Ma  
*Galili* au anatapuna i naeni ma pari au numai i rarau-  
gugula ma arua-apoapoei ivi opuni.

Iesu oroto ivi lawani  
(Mat 8:1-4; Luk 5:12-16)

<sup>40</sup> Anina ma oroto *lepeleperana*, Iesu awarina i nei  
ma au naona i peu ma i raudune ma agu ivi baḡei i pa,  
“Mepa da ma ḡoei, anina da mavi aiainiu. <sup>‡‡</sup>”

<sup>41</sup> Ma Iesu nuabola orana i oai ma urana ivi loloi da  
ivo dadani ma i riwa i pa, “Anina a ḡoeḡoei, ma ai!”

<sup>42</sup> Ma maratogogi opi-doriana, oroto ivo terei ma tau-  
na i ai me. <sup>43</sup> Anina ma Iesu i riwana guratei i pa,  
<sup>44</sup> “Tam ma nae! Aiwai i tuputupua awarim, eḡa rava  
mavi eḡei! Ma jijimanina ma nae *Pirisi* awarina  
mavi etataiana melem mavi aiaina *pulona* Moses i riri-  
weia ma kauai da inavi mataira tau awari! Pirisi ana  
vianina ina verei da tauna i lawana.”

<sup>45</sup> Wate orotona i nae ma aiwai awarina i tuputupua  
lamna melagai au anatapuna i babani ana naiei. Ma  
lamna au baina Iesu melagai anatapui i vorei ma  
mepa eḡa rava ita mamaelana kampa i nae. Wate rava  
mepa maemaei i nei Iesu awarina.

Iesu oroto gwaḡagwaḡana ivi lawani  
(Mat 9:1-8; Luk 5:17-26)

**2** Iesu ana tauvotaḡotaḡo maiteni i wanavira melei  
au *Kapenaum*. Ma au pom ruaḡa au murina, rava  
nolana i nonori da tauna au melagai i nememei. <sup>2</sup> Ma  
rava maḡamaḡau ivi tagogiei au numa. Patara i rata  
guratana da numa i oai ma metaeta maiteni i mae  
potai. Iesu, God riwana i rarau-gugulei. <sup>3</sup> Nelara 4, oro-  
to gwaḡagwaḡana rasirasiei i avarai da i neiai Iesu  
awarina. <sup>4</sup> Rava i maḡa guratana ma eḡa tagotagogina  
da ita neiai Iesu awarina, lamna au baina da tetelei  
i amḡaena da au poewa ma gavogavo i bauni ma kampa  
gwaḡagwaḡana ana rasirasina i tere-ḡairei Iesu au  
naona. <sup>5</sup> Ma Iesu, nai ravai i inanai da ai *vitumaḡana*  
i rata, lamna au baina gwaḡagwaḡana i riwei i pa,  
“Natu, am ḡoa-apoapoei, a nota-tawaneii.”

<sup>6</sup> Anina mai Jew ai *Tarawatu Babadai* ḡelau kampa  
i kiakiala, au orai ivi nuanotanota i pa, <sup>7</sup> “God ainelana  
ḡoa-apoapoei e notanota-tawaneii. Aiwai au baina wei  
ravana nanare e bababani? Tauna, God evivi jiboḡi ma  
e ririwa da tauna, God nanare.”

<sup>8</sup> Maratagogi, Iesu i aramanei da tau i orai nanare  
ivivi nuanotanota ma i riwei i pa, “Aiwai au baina wei  
kauai ovivi nuanotenotei? <sup>9</sup> Metauna i telatela:

<sup>‡‡</sup> Mai Jew ai *TARAWATU* ririwa da rava lepeleperai, tau mirimirai  
ma dobu ḡela ravai (eteni). Mai Jew amapo nai ravai eḡa ina-  
vo dadani. Rava mirimirai eḡa maiteni inavi taparoro bo au melagai  
ina mae. Lamna au baina mepa da rava mirimirana i lawana, tauna  
ina ai me, God tauna ina vai-melei ma rava maiteni ina mae ma  
ina taparoro.

Gwaḡagwaḡana ata riwei, 'Am ḡoa-apoapoe a nota-tawanei.' Bo ata riwei, 'Mavo mairi, am animatave ma vaia ma ma babara?'<sup>10</sup> A ḡoei da taumi ona aramanei da **Rava Natuna**<sup>†</sup> au dobu ana rewapana e mae da rava ai ḡoa-apoapoe ina nota-tawanei ma inavi lawani." Ma gwaḡagwaḡana i riwei i pa, <sup>11</sup> "A riwem, mavo mairi, am animatave ma vaia ma ma nae au numa!"

<sup>12</sup> Orotona ivo mairi, ana animatave i vaia ma maratagogi i babara. Ma patara i raraubiga, i bana kauēi ma God ivo epaepai ma i ririwa, "Tauai eḡa melanai kaua wenanare ata inanai!"

**Iesu, Levi i kwatuei**  
(Mat 9:9-13; Luk 5:27-32)

<sup>13</sup> Iesu, *Kapenaum* ivo terei ma **Galili** topana au gerana i bababara ana tauvotaḡotaḡo maiteni. Ma patara i nei awarina ma tauna God riwana viararamanana ivi karei. <sup>14</sup> Ma ivi raunae aburuna ma oroto tagogi i inanai wavana Levi, *Apius*<sup>††</sup> natuna. Ma tauna ana bagibagi au gabuna i kiakiala ma *tax* i tamitamī Rome gabemanina au baina. Iesu i riwei i pa, "Mavo taḡotaḡoiu!" Levi ivo mairi ma ivo taḡotaḡoi.

<sup>15</sup> *Tax* tautami ma ḡoa-apoapoei ravai maḡamaḡau, Iesu ma ana tauvotaḡotaḡo ivo taḡotaḡoi. Ma anata-pui, Levi ana au numa i kiala gogona ma i amam.

<sup>16</sup> *Jew* ai Tarawatu Babadaī ḡelau, tau maiteni Farisi, i inanai da Iesu *tax* tautami ma ḡoa-apoapoe ravai maiteni i amam. Anina ma tau, Iesu ana tauvotaḡotaḡo i riwei i pa, "Aiwai au baina Iesu *tax* tautami ma ḡoa-apoapoei ravai maiteni e amam?"

<sup>17</sup> Ma maranai Iesu wei riwana i nononori ma tau i riwei i pa, "Rava lawalawai, doketa eḡa ita ḡoeḡoei ma rava doridoriai, doketa e ḡoeḡoei. Tau a nei rava apoapoei au bai ma eḡa rava jijimani au bai."

**Uji vitaraviravirana**  
(Mat 9:14-17; Luk 5:33-39)

<sup>18</sup> Mara tagogi, John Taubabaito ma *Farisi* ai tauvotaḡotaḡo i ujiuji. Ma rava ḡelau i nei Iesu awarina ma ivi taravirevirei, "Aiwai au baina John Taubabaito ma *Farisi* ai tauvotaḡotaḡo e ujiuji, wate tam am tauvotaḡotaḡo eḡa ita ujiuji?"

<sup>19</sup> Iesu i paribelei i pa, "Taumi o notanotai da tau aiavoi i rau-kwatuei tavine ana au torela, ina mae lota bo? Eḡateni kaua! Maranai tavitavine vou orotona, tau maiteni e mamae, tau eḡa ina uji. <sup>20</sup> Wate mara ina ḡeta maranai tavitavine vou orotona ina vai-tawanei ma lamna maranaina ana rava ina uji."

<sup>21</sup> Ma riwa e mamae, "[*Tau kaua vouna a nei ai eḡa me taumi ami kaua wadubona nanare.*] Eḡa ai ai ravana, gara vouna, gara au wadubona ina popo-ratui da gavogavo inavo potai. Mepa da nanare lamna,

† 2:10 Dan 7:13-15 †† Eng. Alphaeus. ‡ Moses God ana Tarawatu i girumi ma mai Farisi wei Tarawatuna ivo taḡotaḡo kauēi. Ma tau kaua waduboi amamai ḡariei maiteni ivovo teletelei ma i riwa da aiavoi Tarawatu eḡa itavo teletelei lamna tau rava apoapoei, ḡoa-apoapoe tau kauēi.

amapo gara vouna, wadubona ina roro ma gavogavo ina rata. <sup>22</sup> Ma nanare, eḡa ai ai *wine* vouna ina vaini da *wine* aniterenana wadubona ḡamoḡamo opinei au orana ina iwaḡi. Mepa da ina kauēi, lamna *wine* vouna ina dodo ma *wine* aniterenana wadubona inavi airoroi ma *wine* ma ana aniterenana ina apoapoe. Wate *wine* vouna, anina da *wine* aniterenana vouna ina iwaḡi."

**Iesu ana riwa Sabate au baina**  
(Mat 12:1-8; Luk 6:1-5)

<sup>23</sup> Mara tagogi au **Sabate**, Iesu ana tauvotaḡotaḡo maiteni, *witi* wapuna au orana i nena. Ma ana tauvotaḡotaḡo *witi* i vaini ma i amam. <sup>24</sup> *Farisi* ḡelau i inanai wei kauana i kaukauēi ma tau Iesu i riwei, "Ma inanai, ata **Tarawatu** e mamae da **Sabate**, lamna lauvitau ana mara. Aiwai au baina tau evovo bagibagi?"

<sup>25</sup> Iesu i paribelei i pa, "Me *peroveta* i girugirimia nanare. *David* ana tauvotaḡotaḡo maiteni am-iraḡe ma aiwai i kauēi? †† Taumi o iavi ma aiwai au baina anona, eḡa ota vinua-notenotei? <sup>26</sup> *Pirisi Ḡeḡete-larana Abiata* ana au mara, David, God ana au numa i rui ma palawa viviaiaina i vaia ma ḡelau ana tauvotaḡotaḡo maiteni i verei da i ani. Moses ana **Tarawatu** e mamae da *pirisi* ava palawana e aniani."

<sup>27</sup> Ma Iesu ana riwa au damona i riwa i pa, "God, **Sabate** i kauēi da rava voaguna au baina ma eḡa rava ita kauēi **Sabate** voaguna au baina. <sup>28</sup> Onavi nua-notenotei, tau **Rava Natuna**, lamna au baina tau anina **Sabate** badana."

**Iesu, Orotu urana irairaḡena ivi lawani**  
(Mat 12:9-14; Luk 6:6-11)

**3** Mara ḡelauna au **Sabate**, Iesu i nae me **pari au numana** ma oroto urana irairaḡena i inanai kam-pa i kiakiala. <sup>2</sup> Ma *Farisi* ḡelau i ḡoei da aiwai Iesu itavi wavui. Lamna au baina i inana taḡotaḡoi da oroto itavi lawani bo eḡa au **Sabate**.<sup>3</sup> Ma Iesu, orotona i riwei, "Ma nei, au naoi ma mairi!" <sup>4</sup> Ma Iesu, ravai ivi taravirevirei i pa, "**Sabate** au marana, metauna i ai: Aiaina tana kauēi bo apoapoenā? Tanavi lawana bo tanavi raḡena? **Tarawatu** aiwai i riwei?" Ma anata-pui i genuana. <sup>5</sup> Iesu ana amloḡaiḡaina i inana viravira ma i inanai da tau orai i bado ma nuanuana i bola-kauēi. Ma Iesu, orotona i riwei i pa, "Uram mavi loloi!" Ma ivi loloi ma i lawana. <sup>6</sup> Ma *Farisi* maratagogi i opu ma i nae **Herod** ana rava awarii †† ma ai oga i tarai da Iesu mena itavi raḡenane.

**Iesu, Patara awari i babani**

<sup>7-8</sup> Iesu ana tauvotaḡotaḡo maiteni, tau i netawanei ma i nae au gera da itavi lauvitau ma mai **Galili** patara ḡaeḡaena, tau ivo taḡotaḡoi. Rava maḡamaḡau, Iesu

†† 2:25 1 Sa 21:1-6 †† Herod ana rava anona lamna mai Jew ai boru, tau aiavoi Rome gabemanina ivovo agui. Tau ai bada wavalatona Herod Anti pas. Mai Jew maḡamaḡau ma mai Farisi maiteni, i notai da Herod ana rava tau tauvibenabenam ai rava au oiena awari.

aiwai i kaukaueia nolana i nonori ma mai *Judia, Jerusalem, Idumia*<sup>†</sup> ma melagai ġelau i waira *Jordan* au babagelauna, *Taia* ma *Sidon*,<sup>††</sup> tau i anapui i nei Iesu awarina. <sup>9-10</sup> Iesu, rava maġamaġau iwi lawani. Ma lamna au baina doridoriai maġamaġau iwi amdudu ma i ġoei da tauna itavo dadani. Lamna au baina ana tauvotaġotaġo i riwei da waga ivo kaukauei. <sup>11</sup> Maranai, arua-apoapoei rava au orai maemaiei, Iesu i inana ma au naona i peu ma i garara, "Tam God Natuna!"

<sup>12</sup> Wate Iesu tau iwi ġaei da avena itavi eġa da tauna aiai.

### Iesu ana Apasol 12 i vinei

(Mat 10:1-4; Luk 6:12-16)

<sup>13</sup> Anina ma Iesu i ġae au ola ma ana ġoana nanare, rava i kwatuei da awarina i ġei. <sup>14</sup> Tauna, nelara 12 i vinei da maiteni ita mae ma muriai ita paritawanei da ita rau-gugula. Ma tau i ġorei *Apasol*. <sup>15</sup> Ma ivo vai-virewapani da arua-apoapoei rava au orai inavi opuni.

<sup>16</sup> Tau i vinevinei 12 ai wava wenanare,

Simon i ġoreġoreia Peter <sup>‡</sup>

<sup>17</sup> ma *Sebidi*<sup>††</sup> natuna James ma ana tevera John

i ġorei *Boanerges*, anona wai parara natunatuna,

<sup>18</sup> Andrew,

Philip,

*Batolomeu*, <sup>‡‡</sup>

Matthew,

Thomas,

James, *Apius*<sup>†††</sup> natuna,

Tadeus, <sup>‡‡‡</sup>

Simon, tauna Zealot, <sup>§</sup>

<sup>19</sup> ma Judas *Iskariote*<sup>†††</sup> tauna Iesu tau-viben-abenameina.

### Rava i riwa da arua-apoapoei Iesu evivi badei.

(Mat 12:22-32; Luk 11:14-23; 12:10)

<sup>20</sup> Ma Iesu ana tauvotaġotaġo maiteni i rui au numa. Ma patara i rieiai da tau i eġa tagotagogina da ita am.

<sup>21</sup> Ma Iesu ana numa ravai nolana i nonori ma i riwa i pa, "Tauna i bua." Lamna au baina i nei da ina taravaini.

<sup>22</sup> *Tarawatu Babadai* ġelau i *Jerusalemei* i nei ma i riwa i pa, "Arua-apoapoei, ai bada *Bielsibab*,<sup>†††</sup> Iesu au orana i rui. Ma lamnei arua-apoapoei evivi opuni."

<sup>23</sup> Lamna au baina Iesu, *Tarawatu Babadai* i ġorei ma awanaini i pa, "*Satan* amapo *Satan* eġa inavi opuni.

<sup>24</sup> Mepa da *dobu ravai* inavi ġavia vivira, lamna dobuna ita mae ava. <sup>25</sup> Ma nanare dam inavi ġavia vivira, nai damna ita mae ava. <sup>26</sup> Ma *Satan* itavo mairi ma itavi ġavianana melei, amapo ita mae ava. <sup>27</sup> Taudanene amapo eġa rava virewapanana ana au numa ina danene, eġa da au naona ravana ġuravei ina raġini

<sup>†</sup> Eng. Idumea <sup>††</sup> Eng. Tyre & Sidon. Rava eġa mai Jew live there. <sup>‡</sup> Anona Ġaima. <sup>††</sup> Eng. Zebedee <sup>‡‡</sup> Eng. Bartholomew <sup>†††</sup> Eng. Alphaeus <sup>‡‡‡</sup> Eng. Thaddaeus. Wavana ġelauna Judas Luk 6:16 <sup>§</sup> Anona lamna tau iwi Jew ma tau i Romans evivi ġaviei. <sup>§†</sup> Rava notanotai da Iskariot, lamna Judas ana melagai. <sup>§††</sup> Eng. Beelzebub. Anona lamna, nabugara ai bada.

ma muriai ina danene. <sup>28</sup> Riwa kaua a ririwemi da God ami apoapoei ma ami vijiboġa anapui ina notatawanei. <sup>29</sup> Wate aiai ravana *Arua Vivivireina* evivi jiboġi God, nai ravana ana ġoa-apoapoei eġa melanai ina notatawanei ma ana ġoa-apoapoei ina mae nonoa."

<sup>30</sup> Iesu wenanare i babani, anona rava ġelau i ririwa, "Iesu au orana arua-apoapoei e mamae." <sup>§†</sup>

### Iesu ana dam oina

(Mat 12:46-50; Luk 8:19-21)

<sup>31</sup> Iesu alona ma varevareina i nei ma au doa i maimairi ma riwa i paritawanei Iesu awarina da ita nei. <sup>32</sup> Ma patara, tauna i kiala kwaviviroi ma tau i Iesu i riwei i pa, "Alom ma novunovum ma varevareim au doa ma e ġoeġoem."

<sup>33</sup> Iesu i paribelei i pa, "Aiai alou ma aiavo varevareiu?" <sup>34</sup> Anina ma Iesu, tau i kiakiala i inana ma i riwa i pa, "Ona inana wei tau i alou ma varevareiu! <sup>35</sup> Aiai God ana ġoana e kaukauei, tauna alou ma novu ma vareiu."

### Doa tapuna ma tapuna ai awanaina

(Mat 13:1-9; Luk 8:4-8)

**4** Iesu, giu i rau-karena melei *Galili* topana au adana. Ma patara i riei da ita rau-taniġanei. Ma patara i rata, au baina tauna au waga i geru ma i kiala ma waga i dudui da ivi rau-opu au topei ma patara au gera i mae.

<sup>2</sup> Ma kaua maġamaġau awanaini i giu ma ivi araramana. <sup>3</sup> Tauna awanaini i babani ma i riwa i pa, "Ona rau-taniġana! Taupaewa, ana wapu ivo kaukauei ma pei i ravi awawari. <sup>4</sup> Pei ġelau i eta i peu. Ma ki i ġeta ma i ani. <sup>5</sup> Ma pei ġelau i doa au ġaiġaimana i peu mepa doa au avavana. Ma lamna au baina maratagogi i gogo. <sup>6</sup> Wate maranai madeġa i rarani, maratagogi i poi, anona warami eġa ita ġaira guratana doa au orana. <sup>7</sup> Pei ġelau, ai donadonai au poui i peu. Ma ai donadonai i gogo ma pei i gogogo i lavani ma eġa ita ua. <sup>8</sup> Ma pei ġelau i doa au aiaina i peu ma i gogo kaua ma i ua, ġelau i 30, ġelau i 60 ma ġelau i 100."

<sup>9</sup> Ma Iesu i riwa i pa, "Mepa da taniġami e mamae, riwa ona nonori!"

### Aiwai au baina Iesu awanaini i babani

(Mat 13:10-17; Luk 8:9-10)

<sup>10</sup> Maranai Iesu ainelana i mamae ma ana tauvotaġotaġo 12 ma tau-rautaniġana ġelau i ġeta ma Iesu iwi baġai da awanaina anona ita riwei.

<sup>11</sup> Ma Iesu i paribelei i pa, "*God ana vigulau* ana kaua mamae govaġana; taumi iwi eġemi ma rava au tano maemaiei, tau iawai anapui awanaini e pari pariverei. <sup>12</sup> Lamna ana kau i da wariaġa *per-oveta* aiwai i girugirumia ina tupua:

*"Tau i inainana ma eġa ita inainana."*

<sup>§†</sup> *Tarawatu tau girumi i parivai-jjigei au baina tau i ririwa da Arua Vivivireina ana nola lamna baravu da parauma. God eġa melanai ai ġoa-apoapoei ina notatawanei.*

*Tau e rarau-taniġana ma eġa ita araramanei; ma lamna au baina tau eġa ita nenei God awarina da ai ġoa-apoapoe ita nota-tawanei."*

(Isa 6:9-10)

### Doa tapuna ma tapuna anoi.

(Mat 13:18-23; Luk 8:11-15)

<sup>13</sup> Anina ma Iesu i riwei i pa, "Wei awanainei a babani ma anona eġa ota aramane bo? Ma awanaina ġelau menanare ona aramanane? <sup>14</sup> Taupaewa, God riwana, rava anatapai e pari parivere. <sup>15</sup> Rava ġelau orai i bag-ibagi me etanai. Riwa au tepana e rauraei, wate maratagogi *Satan* e nenei da riwa rava au orai e vaivai-tawanei. <sup>16</sup> Ma rava ġelau orai me doa viġaiġaimana. Tau, riwa i nonori ma maratagogi ana nuaiaii riwa e vaivaia. <sup>17</sup> Wate warami eġa da eġa ita mamae guratana. Ma maranai nuabola bo rau-iviapoapoe e nenei tau awari, au baina tau ai tumaġana God awarina e teretere. Tau maratagogi e peupeu. <sup>18</sup> Rava ġelau orai me pei, ai donadonai au orai e gogogolana. Tau anina riwa e nononori. <sup>19</sup> Wate lawana ai nuabola ma mane ai nuavainana ma kua ġelau ai au nuaiai e ruirui ma God riwana e lavalavani da eġa ita uua. <sup>20</sup> Ma ġelau, tau me pei doa au aiaina i peu. Tau, lamna anina riwa e nononori ma e vaivai-kauei ma e uua: ġelau 30 ma ġelau 60 ma ġelau 100."

<sup>21</sup> Iesu i riwei i pa, "Rava, eġa aniravilala ita neineiai da iriga au gabaurina ita teretere bo vatara au gabaurina ta pa? Aniravilala ana au anikiala e teretere ta pa? <sup>22</sup> Kua mamae govaġai, anatapatapai avi eġai ma kua govagovaġai nanarena anavi eġai. <sup>23</sup> Mepa da taniġami e mamae, riwa ona nonori!"

<sup>24</sup> Iesu i riwa i pa, "Aiwai o nononoria ona rau-taniġanana kauei, ruva o ruveruveia, God nanare awarimi ina ruvai ma ġelauna ina tavipotoi. <sup>25</sup> Lamna au baina, mepa da riwau ona aramane, tau ġelauna ma ġelauna ana veremi. Ma tau eġa ita aramane, lamna aiwai aburuna i nononoria, lamna ina vineboai."

### Pei gogogona ana awanaina.

<sup>26</sup> Iesu e ririwa i pa, "*God ana vigulau* me rava, *witi* peina au doa ita paepaewi. <sup>27</sup> Ma waguvara e matamatave ma maratome evovo mairi ma pei e gogogo ma e rarata. Wate aiwaiei e gogogo, tauna evivi nuanainei. <sup>28</sup> Doa ana nuaina, pei me *witi* evivi gogoi ma e uua. Au naona e rarau-pairei ma muriai e roverove ma muriai anona e magumagura au tapina. <sup>29</sup> Maranai i magura, rava petona e rarau-karei. Tuaruta marana i ġetai."

### Pei aburuna ana awanaina

(Mat 13:31-32, 34; Luk 13:18-19)

<sup>30</sup> Iesu i riwa i pa, "*God ana vigulau* aiwai ana parivai-patepatei bo aiwai awanainei ana pariveremi? <sup>31</sup> Wenanare, wei aina peina, lamna me gaga peina, pei aburouina au dobu ma au doa i paewi. <sup>32</sup> Ma peina i gogo ma i rata da ai muomuoi i ġetawanei ma raġaraġai ġaeġae i tere ma au ġoui, kiu ai noġi ita voai."

<sup>33</sup> Ma Iesu, awanaina maġamaġau, rava au matai i rau-gugulei da tau ai rau-taniġana ana au ruva nanare. <sup>34</sup> Awanainei, rava awari i ġugiu, wate ana tauvotaġotaġo, tau avawari kua anatapai ivivi eġai.

### Iesu, kojikojira i ravidaumorai

(Mat 8:23-27; Luk 8:22-25)

<sup>35</sup> Nai au bigaina Iesu, ana tauvotaġotaġo i riwei i pa, "Tana damana topa au baba ġelauna." <sup>36</sup> Anina ma *Tauvotaġotaġo*, patara ivo terei. Ma Iesu, metauna waganana au tepana i kiakiala. Kampa i geru ma anatapai i nae, waga ġelau maiteni. <sup>37-38</sup> Iesu, waga au murina unutana i terei ma i rau-nuavuru. Ma kojikojira ġaeġaena i tupua ma rabama, waga au tepana i rauraei ma waira, waga i oaoai. Ma ana tauvotaġotaġo, tauna i ravidagudagui ma i riwei i pa, "Taugiu, nuanuam e bolabolai bo eġa da tana iraġe?"

<sup>39</sup> Ma tauna ivo mairi ma ive ivi ġaei ma i riwei i pa, "Ma genuana!" Ma rabama i riwei i pa, "Ma mae genu-atau!" Ma ive i wana-tuini ma daumora ġaeġaena i matave. <sup>40</sup> Iesu ana tauvotaġotaġo i riwei i pa, "Aiwai au baina o rovorovo? Taumi amapo da eġa ota *vitumaġana!*"

<sup>41</sup> Ma tau i rovo kua ma i riwa vivira i pa, "Wei tauna aiwai da ive ma rabama tauna evovo teletelei?"

### Iesu arua-apoapoena oroto awarina ivi aġaġana op-unei.

(Mat 8:28-34; Luk 8:26-39)

**5** Iesu ana tauvotaġotaġo maiteni *Galili* topana au baba ġelauna i ġeta, mai *Gerasa* ai au dobu. <sup>2</sup> Wei au dobu, *arua-apoapoena* oroto au orana maemaena. <sup>3-5</sup> Eġa aiwai tagotagogina da ita vovai-ubai. Mara maġamaġauna, aena ma urana seinei i raġini. Wate maranaina sein i raġiraġinia, lamna sein ivi aituituini ma eġa tagotagogina da seinei ita pani. Marai ma waguvarai i nene-labalababa ma i garagarara ma ġaimei tupuana i boribori melei ma au kokoaga ma au ola i rau-numa. <sup>6</sup> Maranai Iesu wagei i opuopu, arua-apoapoei orotona i ruiuinia, aueia Iesu i inanai ma kokoagei i ruba ma Iesu au naona i peu ma i raudune. <sup>7-8</sup> Iesu, ravana i riwei i pa, "Arua-apoapoena, wei orotona ma oputawaneii!" Ma orotona, ponana au aidamo ma i garara, "Iesu, God Aidamo Telerana Natuna! Aiwai awariu e ġoeġoei? God wavane avivi baġaim da eġa ma kovoġiu!" <sup>9</sup> Iesu, orotona ivi taravirevirei i pa, "Tam wavam aiwai?"

I paribelei i pa, "Tauai a maġa, au baina tau wavau lamna *Ġavia Patarana.*"

<sup>10</sup> Ma orotona, Iesu ivi baġa guratei da avena arua-apoapoei nai au dobu itavi opuna-tawanei.

<sup>11</sup> Ma poro boruna ġaeġaena au ġereġere ola au adana i labalaba. <sup>12</sup> Ma arua-apoapoei, Iesu ivi baġai, "Ma paritawanelai poro au orai ana rui." <sup>13</sup> Iesu ivi anina. Ma arua-apoapoei, orotona i oputawaneii ma poro au orai i rui. Poro boruna 2000 nanare olei i ruba ġaira da au topa i monu.



<sup>14</sup> Ma poro taipainii i ruba nae au melagai ma au wapu; ma riwa ivi babarai. Ma rava i nei da ita inanai aiwai i tupua. <sup>15</sup> Ma maranai i nae Iesu awarina, orotona au naona arua-apoapoei patarai au orana i mamae; tauna i kiakiala, gara i oteni ma ana nota jijimanina. Ma tau i rovo. <sup>16</sup> Ma aiwai i tupua orotona ma poro awari, tau inananai, rava i riwana naiei.

<sup>17</sup> Ma dobuna ravai, Iesu ivi baġai da dobuna ita oputawaneii.

<sup>18</sup> Iesu au waga i gerugeru ma orotona, Iesu ivi baġai i pa, "Tau maiteni tana nae."

<sup>19</sup> Iesu ivi ġaei ma i riwei i pa, "Ma nae me am au dam. Ma Bada kua aiwai ġaeġaena i kaukaueia ma ana iviaiai tam awarim, tau ma parivereii."

<sup>20</sup> Ma anina orotona, Iesu i netawanei ma i nae au *Decapolis*(melagai 10) da Iesu aiwai awarina i kaukaueia, rava i riwana naiei. Ma tau anapui i nononoria i baiei.

### Iesu, Jairus natuna wavinena ma wavine doridoriana ivi lawani.

(Mat 9:18-26; Luk 8:40-56)

<sup>21</sup> Iesu wagei i damana me topa au baba-ġelauna. Maranai kampa i ġeta ma amapo topa au adana i mamae ma patara i rieiai. <sup>22</sup> Pari au numana badana tagogi, ana wava Jairus i nei Iesu awarina. Maranai tauna, Iesu i inanai, au aena i peu <sup>23</sup> ma ivi baġa guratei i pa, "Natu guguinina e irairaġe. Ma nei ma uram au inina ma terei ma ina lawana."

<sup>24</sup> Anina ma Jairus, Iesu maiteni i nae ma patarana i mae gariġuruvi ma ivo taġotaġoi.

<sup>25</sup> Wavine tagogi, tauna tara-doriana awarina i mae da madeġa 12 i kwa. <sup>26</sup> Ana mane anaputapuna, dokedoketa maġamaġau awarii i tawanei ma eġa tagotagogina itavi lawani ma amapo da ana doria i rarata. <sup>27-28</sup> Tauna, Iesu nolana ma ana babani i nonori ma au orana ivi nuanotanota i pa, "Mepa da ana gara ava anavo dadani ma ana lawana." Ma tauna, Iesu murinei i nei ma ana gara ivo dadani. <sup>29</sup> Maratagogi, tara-doriana i wana-tuini ma malana i vaia da i lawana. <sup>30</sup> Nai maranaina, Iesu malana i vaia da ana rewapana i oputawaneii ma i mae tavirei patara au poui ma i riwa i pa, "Aia i au gara ivo dadani?"

<sup>31</sup> Ana tauvotaġotaġo, tauna i riwei, "Ma inanai, patara i mae gariġuruvim! Ma menanare da u riwa 'Aia i ivo dadani?'"

<sup>32</sup> Wate Iesu i inana viravira da ita inanai ai i ivo dadani. <sup>33</sup> Wavine i rovo kua ma i sisisi, wate i aramane i aiwai awarina i tupua ma i nei ma Iesu au naona i raupari ma aiwai anapui ivi eġei. <sup>34</sup> Anina ma Iesu, wavine i riwei i pa, "Natu, am tumaġana ivi lawanim. Am doria i kwa, ana nuaubam ma nae!"

<sup>35</sup> Maranai i bababani ma rava ġelaui Jairus ana numei i nei ma i riwei i pa, "Natum ana mara i kwa. Eġa Taugiu ma visina-viravirai."

<sup>36</sup> Iesu ai babani i nonora-tawanei ma Jairus i riwei i pa, "Eġa ma rovo, *mavi tumaġana!*" <sup>37</sup> Iesu, rava ġelaui ivi ġaei ma Peter ma James ma ana tevera John

maiteni i nae. <sup>38</sup> Ma Jairus ana au numa i ġeta ma Iesu, patara i inanai; i toutou ma i taratarakwatu <sup>39</sup> ma i rui ma tau i riwei i pa, "Aiwai au baina o taratarakwatu ma o toutou? Tevera eġa ita iraiġe, tauna e matamatave ota."

<sup>40</sup> Ma tau i Iesu i kakei, ma lamna au baina rava ivi opuni au doa ma tevera alona ma amana ma tauna ana tauvotaġotaġo tonuġa maiteni i rui mepa tevera i matamatave-lana. <sup>41</sup> Iesu, tevera nimana i vaia ma i riwei i pa, "*Talitha koum!*" wei anona, "Kukuma, ma-vo mairi!"

<sup>42</sup> Maratagogi ivo mairi ma babara ivi karei (Tauna ana madeġa 12). Ma tau i ba kua. <sup>43</sup> Iesu, tau i riwana guratei da eġa ai i itavi eġei ma i riwa i pa, "Ona viam-bagibagi."

### Mai Nasaret, Iesu i parivirevirei

**6** Iesu ana tauvotaġotaġo maiteni nai dobuna i netawanei ma i nae me ana au melagai. <sup>2</sup> Ma *Sabate* marana i ġeta ma tauna giu ivi karei *pari au numana*. Ma rava maġamaġau i rie i da i rau-taniġanei. Tau anapui i baiei ma ivi taraviravira vivira i pa, "Wei tauna nuaulaula ma aramanana mepa i vaia?" Ma, "Kua aiwaiei e kaukauei?" <sup>3</sup> Anina ma tau i ava i babani vivira i pa, "Tauna tauvoa. Mary ana natuevou ma varevarena James, Joseph, Judas ma Simon ma novunovui weka e mamae tauna bo?" Ma lamna au baina mai *Nasaret*, Iesu i parivirevirei.

<sup>4</sup> Iesu, tau i riwei i pa, "*Peroveta* dobu au ġelaui evivi virei, wate ana au melagai, ana rava ma ana dam oina, tauna eġa ita vivivirei."

<sup>5-6</sup> Tauna i baiei da rava eġa tauna itavi tumaġanei. Tauna eġa tagotagogina da *kua vivirewapanai* kampa ita kauei. Tauna urana, rava ruaġa ota doridoriai au tepai i terei ma ivi lawani. Ma muriai, melagai nununai au ġereġere i araramana nae.

### Iesu ana Apasol i paritawanei da itavi araramana

<sup>7</sup> Ma Iesu, tau i 12 i ġoreiai ma ruaruaġei ava i paritawanana opunei melagai au nununai. Ma rewapana i verei da arua-apoapoei inavi aġaġana opunei. <sup>8</sup> Ma riwa bagibaginei i riwei i pa, "Ami au vaġai, eġa aiwai ona vaia anina jiġona ava; eġa lam, eġa autu bo mane au urami. <sup>9</sup> Ae-uma ona oteni ma eġa kwama ġelauna ona vaia." <sup>10</sup> Ma i riwei i pa, "Metauna melagaina o ruirui ma ivi aninemi. Numa tagonina au orana ona mae da melagaina ona oputawaneii. <sup>11</sup> Mepa da au melagai o ġeta ma rava eġa itavi aninemi bo eġa ita rau-taniġanemi. Nai melagaina ona oputawaneii ma aemi pokauna ona rau-abuabui da tau i ina aramane i da tau i ai wavu!" † †

<sup>12</sup> Ma tau i opu ma rava awari i rau-gugula ma i riwei i pa, "Taumi ami ġoa-apoapoei onavo terei ma

† *Wariaġa mai Jew tauvaġai e nenememei au Israel, tau i au aei pokau e rarau-abuabui maranai Israel ana au parata e ġeġeta, lamna tau i orai evi aiaini. Ma Iesu ana tauvotaġotaġo wei i kauei da melagai ravai ina notai, "Tauvotaġotaġo e ririwa da tauta orata apoapoena me tauta eġa mai Jew."* †† 6:11 Act 13:50-51

*ona mae-taviremi* God awarina!"<sup>13</sup> Tau, arua-apoapoei ivi aḡaḡana opunei. Ma rava doridorai maḡamaḡai, monamona au kolai i waḡi ma ivi lawani. †

### Wavalatona Herod i notai da Iesu, lamna John Taubabataito

<sup>14-16</sup> Iesu nolana i nae da rava anataputapui i aramanei ma tauna i babaniei. Ma rava ḡelau i ririwa i pa, "Tauna, *kaua vivirewapanai* e kaukauei, au baina tauna John Taubabataito iraḡelei ivo mairi me." ḡelau i ririwa i pa, "Tauna Elijah †† i nememei," ma ḡelau i ririwa i pa, "Tauna *peroveta* wariaḡai nanare." Ma Wavalatona Herod, ‡ nolana i nonori ma i riwa i pa, "Tau, John Taubabataito uana a borituini; marina ivo mairi me."<sup>17-20</sup> John ana virarautua, lamna wenanare. Muriai da Iesu ana viararamana nolana itavi karei. Herod, tuana Philip awana i kwalei ma i ravaḡi. Wavinena wavana Herodias. Au murina John, Herod i riwana ḡirigiriei i pa, "*Tarawatu* e mamae da eḡa vareim awana ma kwalei." Ma Herod, riwa i paritawanei da John i pani da panipani au numana i terei. †† Herod ana nuaiaina, John i rarau-taniḡanei. Wate nuanuana i raḡaraḡa.

Ma Herodias, John awarina amlona i ḡaiḡai ma vi-raḡenana i ḡoei. Herod i aramanei da John, tauna rava jijimanina ma rava vivivireina ma i gagaloei. Herod, John i rovoei ma lamna au baina wavinena eḡa tagotagogina da aiwai ita kauai.

<sup>21</sup> Ma wavine, gavogavo i inanai, maranai Herod ana tupua marana i ḡeta ma torela ivo kaukauei. Ma gabemani babadai ḡaeḡaei ma ḡavia ravai ai babada ḡaeḡaei ma *Galili* babadai i rau-kwatuei. <sup>22</sup> Ma Herodias natuna wavinena i nei ma i ara. Herod ma tau maiteni i amam ivi nuaiaini. Ma wavalatona, guguini i riwei i pa, "Aiwai u ḡoeḡoeia mavi baḡaiu ma ana verem!" <sup>23</sup> Ma i parivai-nuaḡani i pa, "God au matana a ririwem da aiwai uvivi baḡeiu ana verem da au vigulau navanavana au paratana."

<sup>24</sup> Ma tevera wavinena i opu ma alona i paridadanei i pa, "Aiwai anavi baḡei?"

Ma i paribelei i pa, "John Taubabataito kolana."

<sup>25</sup> Ma maratagogi ivi paparana ma wavalatona awarina i rui ma ivi baḡai i pa, "A ḡoeḡoei da marina John Taubabataito kolana ma vereu au aboma!" <sup>26</sup> Ma Wavalatona nuanuana i apoapoe kaua. Wate parivai-nuaḡana boiboḡi i kauai tau i amam au matai. Ma lamna au baina guguini, aiwai ivivi baḡei anina ivi aninei. <sup>27</sup> Ma tauviraḡena i paritawanei ma i riwei da John kolana ita nei. Ma i nae panipani au numana ma John uana i borituini. <sup>28</sup> Ma kolana au aboma i terei ma guguini i verei ma guguini, alona i verei. <sup>29</sup> Ma John ana tauvotaḡotaḡo, nolana i nonori ma i nei ma taubeuna i vaia ma au kokoḡa ivi mataveni.

### Iesu nelara 5000 i viam-bagibagi

(Mat 14:13-21; Luk 9:10-17; Jhn 6:1-14)

<sup>30</sup> *Apasoli* i ḡeta memei ma aiwai anataputapuna i kaukauei ma i rarau-gugulei rava awari, Iesu ivi eḡei. <sup>31</sup> Lamna maranai, rava maḡamaḡai i nenei ma i nena da Iesu ana tauvotaḡotaḡo maiteni eḡa gavogavo mepa ita maemae da ita am. Lamna au baina Iesu, tau i riwei i pa, "Taumi ava ona nei ma tana nae au mutulua da laumi ina tau mara aburuna." <sup>32</sup> Ma anatapui wagei i nae au mutulua.

<sup>33</sup> Wate rava maḡamaḡai i inanai i nena ma i aramanei tau aiavo avai. Ma melagai nununai anatapui geraei i ruba gogona da tau i au dobuna i aiḡeta.

<sup>34</sup> Maranai Iesu wagei i tuopu au gera ma patara ḡaeḡaena i inanai ma nuanuana i bola-kauai tau i au baii. Tau me *sipu* ma eḡa ai tauvi pai pai. Ma *Riwana Aiaina* viararamanai i rau-karei. ††<sup>35</sup> Ma au biga e tuturi ai ma ana tauvotaḡotaḡo i nei awarina ma i riwei i pa, "Wei mutulua ma madeḡa e arearere. <sup>36</sup> Rava ma paritawanei da ina nae au melagai ma au wapu au ḡereḡere da ai lam ina gimarai."

<sup>37</sup> Wate Iesu i paribelei i pa, "Taumi ona viam-bagibagi!" Ma tau i paribelei i pa, "Mepa 200 *denarii*††† tana vaia da wei patarana tana viam-bagibagi?" <sup>38</sup> Ma Iesu i paridadanei i pa, "Palawa biaḡa awarimi? Ona nae ma ona baiei!"

Maranai i nelaḡai ma i riwa i pa, "Awariai, palawa five ma iana ruaḡa."

<sup>39</sup> Anina ma Iesu, patara i riwei i pa, "Boru nununai, gidagida au majimajiḡai ona kiala nae." <sup>40</sup> Ma tau i ai au boru ome 50 da 100 ††† nanare i kiala nae. <sup>41</sup> Ma Iesu, palawa five ma iana ruaḡa i vaia ma i ḡoutata au mara ma God ivi egualauai. Ma palawa ivo gimagimai ma iana i ḡutai da ana tauvotaḡotaḡo i verei ma tau, rava i verei. <sup>42</sup> Ma patara i am ma i am iaua. <sup>43</sup> Ma ana tauvotaḡotaḡo, lam am tereterenai i tuarui da poa muomuoi 12 ivi oai. <sup>44</sup> Nelara 5000 i viam-bagibagi.

### Iesu, waira au tepana i babara

(Mat 14:22-33; Jhn 6:15-21)

<sup>45</sup> Anina ma Iesu, ana tauvotaḡotaḡo i egari da ita aidamana au *Bet-Saida*.<sup>5</sup> Tau i waga i geru da i nena. Ma tauna, patara i paritawanei. <sup>46</sup> Patara i paritawanei ma tauna ava i ḡae au ola da ita raupari.

<sup>47</sup> Ma waguvara ana tauvotaḡotaḡo au waga au topa ma Iesu au alala. <sup>48</sup> Ma ana tauvotaḡotaḡo, lare ivo-vo guratei da ita ḡota. Wate ive ivi rau-matamatani. Ma maratomtomo nanare, Iesu i nae awari. Tauna waira au tepana i bababara ma i ḡoei da tau ita tutelarei.

<sup>§†49-50</sup> Ma maranai tau, Iesu i inanai topa au tepana i bababara ma i notai da tauna konaḡa ma i rovo kaukaua ma ivi garagararei. Ma maratagogi Iesu i riwa i pa, "Tepami ina tora! Tau, eḡa ona rovo!"

†† 6:34 Ezk 34:11-15; Jer 23:5-6; Num 27:17 ††† 200 denarii.

*Denarius tagogi lamna taubagibagi ai maia au pom tagogo nolana au baina.* ††† 6:40 Exo 18:21 § Eng. Bethsaida §† 6:48 Exo 33:19; Job 9:11

† 6:13 Jam 5:14 †† 6:14-16 2 Kgs 2:1-15; Mal 4:5-6 ‡ Herod Anti pas, Galili ana Wavalatona. †† 6:17-20 Mrk 1:14

<sup>51-52</sup> Ma au waga i geru ma ive i wana-tuini. Tau i orai i bado ma ivi nuanaina, au baina eġa ita aramanei ana rewapana, kua palawa awarina i kauēi. Ma lamna au baina tau i bana kauēi.

**Iesu, rava doridoriai maġamaġau i Genesaret  
ivi lawani**  
(Mat 14:34-36)

<sup>53</sup> Tau i, topa i damani ma au *Genesaret* i ġeta ma ai waga i raġini. <sup>54</sup> Tau i, waga i netawanei ma rava, Iesu i inanai ma maratagogi i aramanei tauna aiai. <sup>55</sup> Iesu nolana, *Galili* dobuna anapui i naeni ma i nonori da tauna mepa i mamae. Ma kampa, doridoriai rasirasiei ivi vaneiai. <sup>56</sup> Iesu mepa i nenelana, melagai ġaeġae ma muomuoi ma wapu mepa rava e mamae-lana. Ma rava, ai rava doridoriai nai au melagaina i neiai au deba. Ma ivi baġa da doridoriai, Iesu ana gara adana ava itavo dadani. Ma aiavoi ava, Iesu ana gara ivo dadani i lawana.

**God ana Tarawatu mai Jew ai magumagura ai giu  
i ġetawanei**  
(Mat 15:1-9)

**7** <sup>14</sup> *Farisi* ma *Jew* anapui, magumagura ai giu maġamaġau e notanota jijini. Tau i, ai aniuma ma ai aniam anapui e oġaoġai da tau i itavi aiaina melei God au matana. Ma maranai au gimara da e nenei, urai ina oġa ma ina am. Tau i eġa ina am da au naona urai ina oġa kauēi me ai magumagura ai giu nanare.

Maratagogi *Farisi* ġelau i ma *Tarawatu Babadai*, Jerusalemei i nei Iesu awarina da ita rau-taniġanei. Ma tau i inanai da Iesu ana tauvotaġotaġo ġelau i, urai eġa ita oġai ma i amam.

<sup>5</sup> Ma tau i, Iesu ivi taravirevirei i pa, "Aiwai au baina am *Tauvotaġotaġo* magumagura ai giu, eġa ita-vo taġotaġoi ma ana ura miramirai e amam?"

<sup>6</sup> Ma Iesu i paribelei i pa, "Taumi morumorumu ma ovi kua aiaina melema. God ana *peroveta* Isaiiah i riwa kua maranai i riwa, i pa:

*'Wei ravai ipiriei evovo epaepaiu,  
wate nuanuai aueia.*

<sup>7</sup> *Tau i rava ai giu evivi araramani.*

*Lamna au baina ai voepaepa anona eġa.'*

(Isa 29:13)

<sup>8</sup> Taumi, God ana *Tarawatu* o teretere tawanei ma ami giu ovo taġotaġoi."

<sup>9</sup> Ma i riwana melei i pa, "Taumi o aramana kua da God ana *Tarawatu* o gedugeduai ma taumi amama-ami ai giu ovo taġotaġoi. <sup>10</sup> God ana *Tarawatu*, Moses i girugirumia nanare: *'Amam ma alom ma vivirei'*<sup>†</sup> ma *'Aiai amana ma alona e enaena boai, tauna on-avi raġeni.*<sup>††</sup> Wate taumi ovi araramana da aiai awarina mane bo purapura, amana bo alona itavo agui ma ita riwei, 'Awariu purapura a ġoei da ata verem da itavo agui; wate a tereriei pulo, God au baina.' <sup>12</sup> Wei viararamanana, tau i evivi ġaei da amana ma alona eġa inavo agui. <sup>13</sup> Ma wei taunei viararamana, rava awari

ovivi damani; ma God riwana ovivi kwakwavi. Ma kua maġamaġau i ġelau i maiteni o kaukauei."

**Metauna kauai rava orai evivi mirai.**  
(Mat 15:10-20)

<sup>14</sup> Iesu, patara i kwatuana melei ma i riwei i pa, "Anat- apumi ona rau-taniġaneu ma aiwai a ririwemi ona aramanei. <sup>15-16</sup> Aiwei au tanoēi au orami e ruirui, lamna eġa ita vivi miraimi ma aiwai da oramiei e opuopu, lamna evivi miraimi God au matana."<sup>‡</sup>

<sup>17</sup> Anina Iesu, patara ivo terei ma i nae me au numa. Ma ana tauvotaġotaġo, tauna ivi tara-virevirei da wei awanaina anona aiwai. <sup>18-19</sup> Iesu i paribelei i pa, "Taumi maiteni eġa ota aramanei bo? Kua aiwai au tano, rava au orai e ruirui amapo eġa inavi mirai. Anona lamna wei kauai, eġa ita ruirui rava au nuapouna, wate au manawana da e opuopu." (Wei riwanei Iesu, lam anapui ivi aiaini).

<sup>20</sup> Anina ma i riwa i pa, "Aiwai, rava oranei e opuopu; lamna, rava evivi mirai God au matana. <sup>21</sup> Anina rava nuanuane i vinuanotanota apoapoei e opuopu me: vi-awawana labalababa, danene, viraġena, awadanene, <sup>22</sup> ambo, rau-iviapoapoe, moru, erawa, unura, tere-vaideġa, maeġaeġae ma opa. <sup>23</sup> Wei kauai apoapoei anapui oranei e opuopu ma rava evivi mirai."

**Dobu ġelauna wavinena Iesu ivi tumaġanei**  
(Mat 15:21-28)

<sup>24</sup> Ma nai melagaina ivo terei ma i nae *Taia* ana au parata. Ma i rui govaġa au numa ma eġa ita ġoei da rava ita aramanei da tauna kampa, wate eġa tagota-gogina da ita rau-govaġa. <sup>25-26</sup> Wavine tagogi, Iesu nolana i nonori ma i nei awarina. Tauna eġa *Jew* ma dobu ġela ravana au *Fonisia* i tupua, Syria ana au parata. Arua-apoapoena, tauna natuna wavinena aburuna i ruini. Ma alona i nae Iesu au naona i raudune ma ivi baġai da *arua-apoapoena* natuna awarina itavi opuni. <sup>27</sup> Iesu i aramanei da tauna eġa *Jew*; lamna au baina i riwei i pa, "Eġa ita ai da roaroa ai lam ata va-ia da auou ata verei da au naona roaroa ina am iaua."<sup>‡†</sup>

<sup>28</sup> Ma wavine i paribelei i pa, "Bada, aiwai u riwei; lamna riwa kua. Wate auou, roaroa ai lam momoġina, kepakepa au gabaurina e raurau e aniani."

<sup>29</sup> Ma Iesu wei i riwei i pa, "Tam u paribelana kua, au baina arua-apoapoena natum au orana avi opunatawanei. Ma nae me am au numa."

<sup>30</sup> Ma wavine i nae me au numa. Natuna wavinena i inanai i matamatave, arua-apoapoena boiboġi tevera i oputawaneii.

<sup>‡</sup> *Giruma ġelau i Mark uranei i girugirumia wei riwai wenanare e mamae, "Mepa da taniġami e mamae, ona rau-taniġana."* <sup>††</sup> *Riwa roaroa wei au awanaina lamna mai Jew. Tau i e notanotai da tau i ai guratana eġa me rava ġelau i. Lamna au baina tau i dobu ġelau i ravai e ġoreġorei auou.*

### Iesu oroto taniġa-potapotana ma mena birebirena ivi lawani

<sup>31</sup> Iesu *Taia* ana parata i netawanei ma *Sidon* ma Decapolis i verautuini ma i nae au *Galili* topana. <sup>32</sup> Orotu taniġana potapotana ma menana birebirena i neiai Iesu awarina ma ivi baġai da urana au inina ita terei da itavi lawani. <sup>33</sup> Iesu, oroto i taravaina opunei da tau i ava ma ura-gigina, oroto au taniġana i terei ma ura-gigina ġelauna i ovai ma menana ivo dadani. <sup>34</sup> Nuanuana i bolai ma i ġoutata au mara; i lavutu tawanana ma oroto i riwei i pa: “*Efatha!*” Wei anona, “Ma wana-tawanei!” <sup>35</sup> Maratagogi taniġana i wana-tawanei ma menana ivi dagudagu ma i babani kaua. <sup>36</sup> Ma Iesu, tau i ivi ġaei da aiwai i tuputupua, avena rava itavi eġei. Iesu, rava ivi ġaei; wate tau i eġa ita rau-taniġana ma riwa ivi tuai. <sup>37</sup> Ma maranai ravai wei i nonori, tau i banna kau i ma i riwa i pa, “Aiwai anapui i kauana kau i. Tauna, rava taniġa potapotai evivi lawani da e rarau-taniġana ma menabirebirei e bababani.”

### Iesu rava 4000 i viam-bagibagi

(Mat 15:32-39)

**8** Nai maranai, patara ġaeġaena i riana melei. Patara eġa ai lam. Ma Iesu, ana tauvotaġotaġo i kwatuei da i nei ma i riwei i pa, <sup>2</sup> “Au pom tonuġa patara maiteni a mae ma ai lam eġa ma a rau-nu-apoapoelei. <sup>3</sup> Tau i ġelau i, uamei i nei. Mepa da ana am-iraġei ana paritawanei ai au numa, tau i au etanai ina rau-molaġau.”

<sup>4</sup> Ma ana tauvotaġotaġo i paribelei i pa, “Wei mutu-lua ma mepa lam tana vaia da wei patarana tana viam-bagibagi?”

<sup>5</sup> Ma Iesu, tau i paridadanei i pa, “Awarimi palawa bi-aġa?”

Tau i riwa i pa, “seven”

<sup>6</sup> Ma Iesu, patara i riwei da au doa i kiala. Ma palawa seven i vaia ma God ivi egualauei ma ivo gimagimai ma ana tauvotaġotaġo i verei da patara i verei. <sup>7</sup> Ma tau i awari, iana muomuoi ruaġa ota. Iesu i vaia; God ivi egualauei ma ana tauvotaġotaġo i verei da patara i verei. <sup>8</sup> Tau i anapui i am da i am iaua. Ma lam am tereterenai i tuarui da poa ġaeġaei seven ivi oai. <sup>9</sup> Rava 4000 i viam-bagibagi. Ma muriai i paritawanei ai au numa.

### Farisi God ana mataira ivi baġei

(Mat 15:39-16:4)

<sup>10</sup> Maratagogi, Iesu ana tauvotaġotaġo maiteni au waga i geru ma i nae *Dalmanuta* ana au parata.

<sup>11</sup> *Farisi* ġelau i nei ma vi pari pariġai ivi karei Iesu maiteni. Tau i ġoei da Iesu ita rau-dadani da mataira Godei itavi atataiei. <sup>12</sup> Iesu, aruane i lavutu tawanana ma i riwa i pa, “Wei kimta voui, aiwai au baina mataira e ġoeġoei? A ririwana kauemi, amapo mataira eġa ona inana. ††”

† 8:11 Deu 13:1-5; 18:18-22; Jdg 6:17-22; 1 Sa 2:34; 2 Kgs 20:8-11

### Iesu ana tauvotaġotaġo i parivai-notai

<sup>13</sup> Anina ma Iesu, patara i netawanei ma ana tauvotaġotaġo maiteni au waga i geru me ma i damana Topa *Galili* au baba ġelauna. <sup>14</sup> Ma ana tauvotaġotaġo, nuanuai i vuru da ai palawa ita vaia ma palawa tagogi ava au waga i mamae. <sup>15</sup> Iesu, tau i parivai-notai i pa, “Farisi ma Herod ai ġiu † ma ai viararamana moru-moruna ona inana kau i! Lamna me *ist*.”

<sup>16</sup> Ma tau i babani vivira i pa, “Tauta eġa ata palawa au baina da e ririweta.”

<sup>17</sup> Ma Iesu i aramane i tau i riwei, “Aiwai au baina o bababani da taumi awarimi eġa palawa? Taumi amapo da eġa ota aramana ma ovivi nuanaina? Orami i bado bo? <sup>18</sup> Matami e mamae ma eġa ota inainana. Ma taniġami e mamae ma eġa ota nonora. Ma o notanotai bo eġa? <sup>19</sup> Maranai palawa five avo gimagimai rava 5000 au biai, lam am tereterenai o tami da poa bi-aġa ovi oai?”

Tau i paribelei, “Twelve.”

<sup>20</sup> “Ma maranai palawa seven avo gimagimai rava 4000 au biai, lam am tereterenai o tami da poa ġaeġaei bi-aġa ovi oai?”

Tau i paribelei, “Seven.” <sup>21</sup> Ma tau i riwei i pa, “Ma amapo da ovivi nuanaina!”

### Iesu, oroto matapotapotana ivi lawani au Bet-Saida

<sup>22</sup> Tau i nei au *Bet-Saida* ma rava ġelau i, oroto matapotapotana i neiai Iesu awarina ma ivi baġai da inina itavo dadani. <sup>23</sup> Ma Iesu, oroto matapotapotana i raunimavoai ma melagaiei i taravaina opunei. Ma kampa matana i ovai ma urana au matana i terei ma i paridadanei, “Aiwai e inainanai bo eġa?”

<sup>24</sup> Ma i taepai ma i riwa, “Rava a inainanai ma tau i me ai ita bababara.”

<sup>25</sup> Iesu, urana i tere-melei oroto au matana. Ma matana i wana-tawanei da aiwai anapuna i inana kau i. <sup>26</sup> Iesu, tauna i paritawanei ana au numa ma i riwei, “Eġa ma nae au melaga i!”

### Peter i riwa da Iesu, tauna Keriso

(Mat 16:13-16; Luk 9:18-20)

<sup>27</sup> Iesu, ana tauvotaġotaġo maiteni i nae melaga i *Sis-aria-Fili pai* au ġereġerei. Maranai i nena e ma Iesu, tau i paridadanei, “Rava e ririwa; tau ai ai?”

<sup>28</sup> Ma tau i paribelei, “Ġelau i e ririwa da tam, John Taubabataito. Ma ġelau i e ririwa Elijah. Ma ġelau i e ririwa da *peroveta* wariaġana tagogi.”

<sup>29</sup> Ma Iesu, tau i paridadanei, “Wate taumi, mena o notanotanei? O ririwa da tau ai ai?”

Peter i paribelei, “Tam *Keriso*.” [Tauvilawana Godei]

<sup>30</sup> Iesu, tau i ivi ġaei da eġa ai ai ina riwei da tauna ai ai.

†† 8:12 Mat 12:39; Luk 11:29 † In the Jews' thinking, 'yeast' is picture talk for something that spreads rottenness/badness among people, like yeast spreads through flour. When Jesus says 'yeast' here, he is talking about the bad teaching and example/way-of-living of the Pharisees and Herod.

### Iesu ana iraġe ma ana vomairi me i babaniei

(Mat 16:21-23; Luk 9:21)

<sup>31</sup> Ma Iesu i rau-karei da ana tauvotaġotaġo i giuni i pa, "**Rava Natuna** ina vinua-apoapoe kaua. Ma dogadogara, **Pirisi Babadai** ma **Tarawatu Babadai**, tauna ina parigeduai ma tauna ina iraġe. Ma au pom tonuġa au murina inavo mairi me." <sup>32</sup> Iesu jijimaninei wei kauai i bababaniei ma lamna au baina Peter, tauna i taravaini au ririva ma enana ivi karei. <sup>33</sup> Wate Iesu i mae tavirei ma ana tauvotaġotaġo i inanai. Ma Peter i eni, i pa, "**Satan** ma nae au muriu! Tam am nota eġa Godei ita nenei, eġa da ravei."

### Iesu votaġotaġona anona

(Mat 16:24-28; Luk 9:23-27)

<sup>34</sup> Ma Iesu, patara ma ana tauvotaġotaġo i rau-kwatuei ma i riwei, "Mepa da aiai itavo taġotaġoiu. Tauna ina boviana melei ma ana **korosi** ina avarai ma inavo taġotaġoiu. <sup>35</sup> Aiai ravana ana lawana etata jijini, ina vineboai. Ma aiai da ana lawana i verenei; tau ma **Riwana Aiaina** au baina. Tauna ana lawana ina vai-melei. <sup>36</sup> Mepa da aiai: wei dobuna lawanana ma vigulauna ina vai pai; ma lawana Godei ina vineboai. Wei vigulauna, tauna menanare ina agunei? <sup>37</sup> Wate aiwaiei am lawana ma gimara melei. <sup>38</sup> Mepa da aiai: tau ma au viararamana inavi nimalei; ma i mae puputeu; ma ana ġoanei kaua apoapoe ina kaukauei. **Rava Natuna**, tauna inavi nimalei maranaina ina nememei; Amana ana au boruma **anela** vivivirei maiteni."

**9** Ma Iesu, tau i riwei, "Taumi a ririwana kauemi, rava ġelaumi weka o maimairi amapo eġa ona iraġe da God ana vigulau ona inanai ana rewapanana ina nei."

### Iesu inanana i virai

(Mat 17:1-13; Luk 9:28-36)

<sup>2</sup> Au pom six muriai, Iesu, Peter, James ma John i taravaini. Ma tau i ava i ġae ola ġaeġaena au tepana. Ma kampa tau i matai, Iesu inanana i virai. <sup>3</sup> Ana gara i arapaira ma gamrina ivi mata kamokamota; eġa me aiwai ġelauna au dobu nanare. <sup>4</sup> Ma kampa au matai, Elijah ma Moses i eġa. Ma Iesu maiteni i bababani. <sup>5</sup> Ma Peter Iesu i riwei, "Tauviararamana, i ai da tauta weka. Mavi aninelai da numakweta tonuġa ana voai: tagogi tam au baim, ġelauna Moses ma ġelauna Elijah!" <sup>6</sup> Ma tau i rovo kaua ma Peter eġa ita aramane i da aiwai i latolatonu.

<sup>7</sup> Anina ma apau i eġa ma tau i purui. Ma pona apauei i opu ma i riwa i pa, "Wei Tau Natu au nu-avainana, ona rau-taniġane!" <sup>8</sup> Maratagogi tau i inana viravira ma eġa aiai ġelauna ita inanai ma Iesu, tauna ava.

† Wei lamna awanaina. Anona lamna Iesu ana tauvotaġotaġo anina vinimala ma apoapoei ina nelaġai au baina tau, tauna ivo taġotaġoi. Tauna eġa ita ririwa da ana tauvotaġotaġo au korosi ina iraġe me tauna.

<sup>9</sup> Ma maranai olei i ġaiġairai ma Iesu, tau i ivi ġaei da aiwai i inananaia eġa inavi eġai da au naona **Rava Natuna** iraġelei inavo mairi me.

<sup>10</sup> Ma tau, Iesu riwana ivo teletelei ma i babani vivira i pa, "Iraġelei vomairi me anona aiwai?" <sup>11</sup> Ma tau, tauna ivi taravirevirei i pa, "Aiwai au baina, **Tarawatu Babadai** e ririwa da Elijah au naona ina nei?" ††

<sup>12</sup> Iesu i paribelei, "Riwa kaua Elijah au naona ina nei da aiwai anapuna inavo kaukauei. Aiwai au baina wariaġa i girumi da **Rava Natuna** ina vinua-apoapoe kaua ma ina inana geduaiei. <sup>13</sup> Wate a ririwana kauemi da Elijah anina i nei ma rava, rava ai ġoanei tauna i rau-iviapoapoelele me i girugirumia nanare." ††

### Iesu arua-apoapoena tevera orotona awarina ivi opuni

(Mat 17:14-21; Luk 9:37-43a)

<sup>14</sup> Iesu ana tauvotaġotaġo tonuġa maiteni olei i ġaira memei. Ai rava awari ma patara ġaeġaena, tau i gar-iġuruvi. Ma **Jew** ai Tarawatu Babadai, tau maiteni ivivi tarapiri. <sup>15</sup> Maranai patara, Iesu i inanai. Tau orai i auepai ma awarina i ruba ma ivi egualaei. <sup>16</sup> Iesu, tau i ivi taravirevirei, "Aiwai ovi tarapiriei?"

<sup>17</sup> Orotu tagogi patara au poui i paribelana, "Tauviararamana, **arua-apoapoena** natu orotona au orana e mamae ma i kauei da eġa ita bababani, lamna au baina a neiai awarim. <sup>18</sup> Maranai ana doria e ururu melei, lamna arua-apoapoena: tauna au doa e tawatawanei; gamona evivi purupuro; ivona e utauta ġiriġiriei; ma inina e badobado. Am **Tauvotaġotaġo** avi baġai da arua-apoapoena itavi opuni, wate eġa tagotagogina da ita kauei."

<sup>19</sup> Ma Iesu i paribelei, "O mara aiwai **onavi tumaġana!** Ta mae ġaġa ma ami vita ana avara ġaġalei? Tevera awariu ona neiai!"

<sup>20</sup> Ma tevera i neiai Iesu awarina. Ma maranai arua-apoapoena, Iesu i inanai, maratagogi tevera ivi aikwajiana guratei da au doa i tonei ma ivi tatauvira ma ivivi purupuro. <sup>21</sup> Iesu, tevera amana ivi taravirevirei, "Wei teverana ana doria mara aiwai ivi karei?"

I paribelei i pa, "Maranai tauna aburunai. <sup>22</sup> Arua-apoapoena mara au anapuna, tauna ai au araratana ma au waira e tawatawanei ma i ġoei da itavi raġeni. Mepa da tam tagotagogina ma rau-nuapoapoelele ma ma voagui!"

<sup>23</sup> Iesu, tauna i riwei, "Menanare da u riwa, 'Mepa da tam tagotagogina?' Aiai ravana evivi tumaġana, God anapuna ina kauei tauna au baina."

<sup>24</sup> Maratagogi tevera amana i garara, "**Avi tumaġana**, wate au tumaġana eġa ita rata ma ma voagui da ina rata!"

<sup>25</sup> Iesu i inana da patara i rierieiai awarii ma lamna au baina arua-apoapoena i egari i pa, "Tam arua taniġapotapotana ma gumgum. Tau a egaegarim da tevera

†† Mai Jew ivi tumaġana da Elijah au naona ina nememei ma Keriso muriai ita nei. (Mal 3:1, 4:5-6). Ma tau eġa ita notai da Elijah rau-iviapoapoe ina nelaġai ana au nememei. ‡ 9:12 Isa 52:13-53:12; Psa 22 †† Iesu lamna John Taubabataito i bababanie i da tauna Elijah. (Mat 11:13-14, 17:10-13)

ma oputawanei. Ma eġa melanai tauna au orana ma rui me!”

<sup>26</sup> Ma *arua* i garara ma tevera ivi aikwajiana guratei ma i oputawaneii. Ma tevera inanana me taubeu. Ma rava maġamaġau kampa i riwa, “Tauna i iraġe!” <sup>27</sup> Ma Iesu, tauna urana ivo jijini ma i sinaepai da i mairi.

<sup>28</sup> Muriai Iesu, ana tauvotaġotaġo maiteni i rui au numa. Ma maranai tau i ava ma i paridadanei i pa, “Aiwai au baina tauai eġa tagotagogina da arua-apoapoena atavi opuni?”

<sup>29</sup> Iesu, tau i riwei, “Arua-apoapoei wenanare, pari ainelana inavi opuni.”

### Iesu ana iraġe i babaniana melel

(Mat 17:22-23; Luk 9:43b-45)

<sup>30</sup> Iesu, ana tauvotaġotaġo maiteni dobuna i netawanei ma *Galili* i verautuini. Iesu eġa ita ġoei da rava ita aramanei da tau i mepa. <sup>31</sup> Au baina tauna, ana tauvotaġotaġo ivi araramani i pa, “Tau i *Rava Natuna* ina amverenei rava ġelau i urai. Ma tau i inavi raġeni. Wate au pom tonuġa au murina inavo mairi me.”

<sup>32</sup> Wate tau i eġa ita aramanei tauna aiwai i babananiei. Ma tau i paridadanana i rovoei.

### Tauvotaġotaġo ivi tarapiri vivira da aiai i ġetelara

(Mat 18:1-5; Luk 9:46-48)

<sup>33</sup> Iesu ma ana tauvotaġotaġo i ġeta au *Kapenaum* ma au numa i rui. Ma Iesu, tau i ivi taravirevirei, “Au etanai aiwai ovi tarapiriei?”

<sup>34</sup> Wate tau i genuana au baina au etanai tau i ivi tarapiri vivira da aiai i ġetelara. <sup>35</sup> Iesu i kiala ma tau i 12 i rau-kwatuei awarina ma i riwei i pa, “Aiai e ġoeġoe da inavi bada. Tauna ina tereġairana melel ma in-avi muri dewadewa ma inavi taunola rava au bai.”

<sup>36</sup> Ma Iesu, tevera i vaia ma au poui ivi mairini. Ma tauna, urana au jiġona i teretaġonei. Ma tau i riwei i pa, <sup>37</sup> “Aiai ravana; tau wavauei, tevera wenanare i rau-ġorei. Lamna tau maiteni e rarau-ġoreiu. Ma aiai da tau e rarau-ġoreiu. Lamna tauparitawaneu maiteni e rarau-ġorei.”

### Aiai eġa ata ġavia, lamna turata

(Luk 9:49-50)

<sup>38</sup> Anina ma John, Iesu i riwei, “Tauviararamana! Tauai, oroto tagogi a inanai; tam wavamei arua-apoapoena ivivi opuni ma tauna eġa turata. Lamna au baina avi ġaei da eġa ina kauana melel.”

<sup>39</sup> Iesu i riwa, “Eġa ona viġaei! Eġa aiai au wavau *kaua babai* ina kau i muriai ina parivai-apoapoeniu.

<sup>40</sup> Aiai ravana eġa ata ġavia; lamna turata. <sup>41</sup> Tau a ririwana kauemi. Mepa da aiai ravana, waira i veremi tau au wavau; au baina taumi au Tauvotaġotaġo. Tau i maia eġa ina vineboai.”

### Rauelara babanina

(Mat 18:6-9; Luk 17:1-2)

<sup>42</sup> Mepa da aiai ravana i kau i wei teverana ana tumaġana tau awariu ivi apoapoeni da ġoa-apoapoe

i kau i. God, tauna ina kovoġa guratei. Eġa me ġaima ġaeġaena, rava au uatabana ina duri ma au boga ina tawanei. <sup>43-44</sup> Mepa da nimam i kauem da ġoa-apoapoe u kau i. Ma bori-tawanei! I ai da nimam tagogi ava ma lawana ma mae nonoana ma vaia. Ma eġa ma kau i da nimam ruaġa aiai ma ma nae ai au menamenana; mepa ai eġa melanai ita bobo.

<sup>45-46</sup> Mepa da aem i kauem da ġoa-apoapoena u kau i. Ma bori tawanei! I ai da sigesigem au lawana ma mae nonoana ma rui. Eġa me aem ruaġa aiaina ma ai au menamenana ina tawanem. <sup>47</sup> Ma mepa da matam ina kauem da ġoa-apoapoena u kau i. Ma vaitawanei! I ai da matam tagogi ma God ana vigulau ma rui. Eġa me matam ruaġa ma ai au menamenana ina tawanem; <sup>48</sup> dobuna motamotana eġa ita irairaġe ma ai eġa ita bobo. †

<sup>49</sup> Au Tauvotaġotaġo anataputapui, ai araratanei ina bogai. ††

<sup>50</sup> “Nia i ai lam viaiainana au baina. Ma mepa da i tomatoma, mena ma vidagiane. Nia au orami ina mae ma onavi turana vivira!”

### Iesu tavine vilamonana i babaniei

**10** Ma Iesu, dobuna i netawanei ma i nae *Judia* ana au parata. Ma Waira *Jordan* i damani da au baba ġelauna. Patara ġaeġaena i riana melel. Ma Iesu ivi araramana, me mara patapatana i kaukauei nanare.

<sup>2</sup> Ma *Farisi* ġelau i ġoei da tauna ita waroi. Ma lamna au baina ivi taravirevirei, “*Tarawatu* e mamae bo eġa da rava, awana maiteni itavi lamonei?”

<sup>3</sup> Ma Iesu i paribelei, “Moses ana *Tarawatu* aiwai e ririwei?”

<sup>4</sup> Ma tau i riwa, “Moses ana *Tarawatu* e ririwa da oroto ‘*vilamona pepana ina girumi ma awana ina verei. Ma tau i inavi lamonei.*” ††

<sup>5</sup> Iesu i paribelei, “Taumi orami i pota. Au baina Moses wei *Tarawatu* i terei. <sup>6</sup> Wate ona notai da au karena, maranai God rava i kau i ‘*ma tauna oroto ma wavine i kau i.*’<sup>†††</sup> Ma lamna au baina oroto amana ma alona ina netawane<sup>†</sup> ma awana maiteni inavi tagog<sup>†††</sup> da tau i eġa ruaġa me au naona ma tupua tagogi.

<sup>9</sup> God aiwai ivi tagogiei, eġa aiai inavi lamonei.”

<sup>10</sup> Maranai tau i naeme au numa, ma *Tauvotaġotaġo*, Iesu ivi taravirevirei wei kau i au baii. <sup>11</sup> Iesu i paribelei, “Mepa da oroto, awana ivo terei. Ma wavine ġelauna i ravaġi. Lamna tauna, awana awarina i rau-iviapoapoe. <sup>12</sup> Ma nanarena mepa da wavine, oroto ivo terei ma oroto ġelauna i ravaġi. Lamna tauna, awarina i rau-iviapoapoe.”

### Iesu, roaroa muomuoi ivi aiaini

<sup>13</sup> Rava ġelau i, roaroa i neiai Iesu awarina da urana au tepai ita terei. Ma ana tauvotaġotaġo, ravai ivi ġaei.

<sup>14</sup> Maranai Iesu wei kau i i inanai. Ma ana tauvotaġo-

† *Wariaġa nimaiei i giruma damanei tau i riwana tagogina me v 48.* †† *Wariaġa nimaiei i giruma damanei tau i riwana tagogina me v 48.* † *9:48 Isa 66:24 †† 9:49 Lev 2:13 †† 10:4 Deu 24:1-4; Mat 5:31 ††† 10:6 Gen 1:27; 5:2 ††† 10:7-8 Gen 2:24*

taġo i eni ma i riwa, "Roaroa onavo terei da awariu ina nei. Ma eġa ona viġaei. Au baina God ana vigulau, lamna rava wenanare au bai me wei roaroai. <sup>15</sup> A ririwana kauemi. Ai ai, God ana vigulau eġa ina vaia me tevera aburuna nanare. Tauna, eġa God ana au vigulau ina rui. <sup>16</sup> Ma roaroa i taravaini ma i rapai, urana au tepai i terei, i raupari ma ivi aiaini.

**Purapura ravana, Iesu i paridadanei lawana mamae nonoana au baina**

(Mat 19:16-30; Luk 18:18-30)

<sup>17</sup> Ma maranai Iesu ivo mairi da i nena. Orotto i ruba ġeta ma au naona i raudune ma i riwa i pa, "Tauviararamana vivinualaulaunam. Aiwai ana kauai da lawana mamae nonoana ana vibuderiei?"

<sup>18</sup> Ma Iesu i paribelei i pa, "Aiwai au baina, tau uvi kava vivinualaulauneu? God, tauna ava vivinualaulaunana. <sup>19</sup> Tam, God ana **Tarawatu** u aramanei: *'Eġa mavi raġena! Eġa ma awadanene! Eġa ma danene! Eġa mavi wavumoru! Eġa ma am-kwalakwala! Amam ma Alom ma vivirei!'*"

<sup>20</sup> Ma tauna i riwei, "Tauviararamana! Maranai tau aburueu da amadodo, wei Tarawatui anapui avo teletelei."

<sup>21</sup> Iesu, tauna i inanai ma ivi nuavaini ma i riwei, "Kava tagogi e mamae eġa uta kaukauei. Ma nae ma am purapura anapuna ma gimarei. Ma manena, rava molamolakai ma verei. Ma au mara God, tam inavivai ma i maiem. Ma ma nei ma mavo taġotaġoiu!"

<sup>22</sup> Ma maranai orotto wei riwana i nonori. Naona i peu ma ana nuabolana i nae; au baina tauna, purapura ravana.

<sup>23</sup> Iesu i inana viravira ma ana tauvotaġotaġo awari i riwa, "I piripiri kava da purapura ravana, God ana au vigulau ina rui."

<sup>24</sup> Tauvotaġotaġo riwana i baei maranai Iesu wenanare i babani. Ma Iesu i riwa me, "Natunatu! I piripiri kava da purapura ravana, <sup>††</sup> God ana au vigulau ina rui. <sup>25</sup> I telatela kava da ġamoġamo ġaeġaena wavana kamel, iġoma au gavogavona ina rui. Ma i piripiri guratana da purapura ravana, ana lawana God ina verei. Ma God, tauna inavivai badei."

<sup>26</sup> Tau i ivi nuanaina ma ai nota i kwa. Ma tau i avai babani vivira i pa, "Mepa da nanare; amapo ai ai lawana mamae nonoana ina vaia?" <sup>‡</sup>

<sup>27</sup> Iesu awarii i inana ma i riwei, "Rava awarii wei kauai i piripiri. Wate eġa God awarina. God awarina aiwai anapuna i telatela kava."

<sup>28</sup> Ma Peter i riwei, "Ma tauai menanare? Tauai ai purapura avo terei ma tam avo taġoim." <sup>‡‡</sup>

<sup>29</sup> Iesu i paribelana, "A ririwana kauemi. Ai ai da ana numa bo varevareina bo novunovuna bo alona bo amana bo natunatuna bo ana wapu inavo terei ma tau

inavo taġotaġoiu; tau ma **Riwana Aiaina** au baina.

<sup>30</sup> Tauna ana maia ina rata kava wei au dobuna. Tauna ana maia inavivai aitepatepani da ana numa, varevareina, novunovuna, alona, natunatuna ma ana wapu, anatapui ina maġa. Rava ina rau-iviapoapoelem; au baina tam, tau au Tauvotaġotaġo da mara au murina tauna lawana mamae nonoana ina vaia. <sup>31</sup> Wate maġa-maġai marina evi vinoa; tau i inavivai muri. Ma maġa-maġai da evivi muri; ina vinoa.

**Iesu ana iraġe babainina ivi tonui**

(Mat 20:17-19; Luk 18:31-33)

<sup>32</sup> Iesu, ana tauvotaġotaġo maiteni i ġeġae au **Jerusalem**. Iesu, tau i naoi i nena. tauvotaġotaġo i baei. Ma rava ġelau i au muri i neni i rovo kava. <sup>‡‡</sup> Ma tau i 12 i rau-ġorei au ririva ma i rau-karei da kava amapo awarina ina tupua; tau i ivi eġe <sup>33</sup> I pa, "Ona inana, tauta ta ġeġae au **Jerusalem**. Ma **Rava Natuna** ina verenei **Pirisi Babadai** ma **Tarawatu Babadai** awarii. Ma tau i ana iraġe inavivai aninei. Ma **dobu ravai** ina verei. <sup>34</sup> Ma tauna inavivai jiboġi ma ina ovai ma ina kwapui ma inavivai raġeni. Au pom vitonvina inavo mairi me."

**James ma John ai vibaġa**

(Mat 20:20-28)

<sup>35</sup> James ma John, **Sebidi** natunatuna i nei Iesu awarina ma ivi baġai i pa, "Tauviararamana! Tauai ai ġoana avivi baġei uta kauai."

<sup>36</sup> Iesu i riwa i pa, "Aiwai o ġoeġoei ana kauai au baimi?"

<sup>37</sup> Tau i paribelana, "Ma verelai da ana kiala, tagogi au oim ma ġelauna au kelakelaum am au vigulau."

<sup>38</sup> Iesu i paribelei, "Taumi eġa ota aramanei aiwai ovivi baġei! Inivara kelakana ana umai. Taumi tagotagogina da ona umai bo? Tagotagogina ona babataito me tau ina babataitoiu? <sup>‡‡†</sup>"

<sup>39</sup> "Tauai tagotagogina!" tau i paribelana.

Iesu, tau i riwei, "Inivara kelakana anina ona umai ma ona iraġe me tau ana iraġe. <sup>40</sup> Wate tau au rewapana eġa ita mamae da ana veremi da mepa ona kiala au oiu bo au kelakela. God, rava ivi nevinei; tau i ai gabu ivo kaukauei."

<sup>41</sup> Maranai Tauvotaġotaġo 10 ġelau, wei riwana i nonori. Tau i James ma John awarii i ġaiawa. <sup>42</sup> Ma Iesu, tau i anapui i ġorei da awarina ma i riwei, "O aramanei da dobu ravai ai babada, dobu ġela ravai awarii e mamae ġaeġae ma e rarau-iviapoapoelei. Wate tau i ai babada ġaeġae, ai rewapana i ġetelera da ai rava evi badebadei da ai ġoana e kaukauei. <sup>43</sup> Wate au tauvotaġotaġo eġa nanare. Eġa da ai ai i ġoei da

---

<sup>††</sup> Iesu i ġeġae au Jerusalem ma rava maġamaġai ivi ġaviei ma lamna au baina ana tauvotaġotaġo i baei da tauna tepana i tora da tauna weka i nena. Rava ġelau ivo taġotaġo, tau i rovo kava da aiwai awarina ina tupua maranai i ġeta au Jerusalem. <sup>‡‡†</sup> "babataito me tau ina babataitoiu" tau i inivara ma iraġe e bababaniei, maranai Iesu au Getsemani i raruari muriai da ana iraġe tauna ana nuabolana kelaka i babaniei (Mrk 14:36) Iesu James ma John i riwei da nuabola ina nelaġai.

<sup>†</sup> 10:19 Exo 20:12-16; Deu 5:16-20 <sup>††</sup> Wei riwana buka ġelau awarii e mamae ma ġelau eġa [purapura ravana]. <sup>‡</sup> Mai Jew i notai da rava vipurapurai lamna God ana verena ana nuavaina matairana, tau i e notai da God rava vipurapurai eġa ina gagaloei, tauna ravai ġelau maiteni eġa ina gagaloei. <sup>‡†</sup> Peter i ġoei da ita aramanei da Tauvotaġotaġo ai au iraġe maiana aiwai, ina vaia.

ina ġetelara taumi au poumi; tauna anina inavi taunola. <sup>44</sup> Aiai i ġoei da ita vīnao. Tauna inavi taunola rava anatapai au bai. <sup>45</sup> Ma nanare *Rava Natuna* eġa ita nei da tauna, tata nolei. Wate itavi taunola rava au baii. Ma ana lawana ita verenei da rava maġamaġau ai lawana ita gimara melel. †

**Iesu, rava matapotapotana Bartimaeus ivi lawani**  
(Luk 18:35-43)

<sup>46</sup> Ma tau i ġeta au *Jeriko*. Iesu, ana tauvotaġotaġo, patara ġaeġaena maiteni dobuna i opuoputawaneii. Maranai oroto matapotapotana, wavana *Batimeus*, *Timeus* natuna au etanai i kiakiala ma i vīam-gigi-mana. <sup>47</sup> Maranai i nonori da tauna, Iesu *Nasaretei*; garara i rau-karei i pa, "Iesu, tam *David* natuna! Ma rau-nuapoapoeleu!" ††

<sup>48</sup> Rava maġamaġau, tauna i rai ma i riwei da ita genuana. Wate tauna, garara ivo guratei, "David Natuna! Ma rau-nuapoapoeleu!"

<sup>49</sup> Iesu i tumairi ma i pa, "Ona ġoreiai!"

Anina tau i matapotapotana i ġoreiai i pa, "Tepam ina tora ma mavo mairi! e ġoreġorem!"

<sup>50</sup> Tauna, ana puru i tawane i ma ivo mairi laġilaġina ma i nei Iesu awarina.

<sup>51</sup> Iesu i paridadana i pa, "Aiwai u ġoei ana kauei au baim?"

Matapotapotana i paribelei, "Tauviararamana! A ġoei da ana inana me."

<sup>52</sup> Iesu i riwa, "Ma nae! Am tumaġana ivi lawanim." Maratagogi tauna i inana me ma Iesu au eta ivo taġotaġoi.

**Iesu i rui au *Jerusalem***

(Mat 21:1-11; Luk 19:28-40; Jhn 12:12-19)

**11** Ma maranai *Jerusalem* i tuġereġerei ma i rui au *Bet-Fagi* ma *Bet-Ani*<sup>†</sup> au ola *Olives*. Ma ana tauvotaġotaġo ruaġa i paritawane i, <sup>2</sup> ma i riwei i pa, "Ona nae au melaga i au naomi. Maranai o rui, kampa *donki* natuna ġaubo, raġiraġitana ona nelaġai. Tau-na eġa aiai ita geru dadanei. Ona rupeni ma ona neiai. <sup>††3</sup> Mepa da rava aiai ina paridadana, 'Aiwai au baina wei o kaukauei?' Ona riwei, 'Bada e ġoeġoei ma maratagogi ina paritawana melel.'"

<sup>4</sup> Ma i nae ma *donki* natuna au doa au metaeta raġiraġitana i rupeni. <sup>5</sup> Rava ġelau kampa i maimairi i paridadana i pa, "Aiwai o kaukauei *donki* natuna o ruperupeni?"

<sup>6</sup> Ma i paribelei me Iesu i ririweia nanare ma tau i ivo terei da i nae. <sup>7</sup> Tau i *donki* i neiai Iesu awarina ma ai puru au uporana i tawana epai ma au tepana Iesu

† Iesu ivi nuapoapoe ma iraġe au baita me *Isaiah* i *girugirumia* nanare au *Is* 52:13-53:12 †† Maranai oroto matapotapotana Iesu i kwatuei "David natuna" ma mai Jew i aramane i *Keriso* God ana vinevine i babaniei. Mai Jew i aramane i *Keriso*, God ana vinevine i nei da rava doridoriai itavi lawani me tau i wavalatona me *David* wariaġa nanare. (*Ps* 89:3-37, *Is* 29:18-19, 35:5-6; *Je* 23:5-6, *Ez* 34:23-24). ‡ Eng. *Bethphage* & *Bethany*. †† Mai Jew awari, *donki* lamna nola au baina ma eġa gulau ana anigeru. *Donki* i geru i lamna e ririweta da tauna gulau ana nuabana ma vilamolamonana i nei.

i kiala. <sup>††8</sup> Ma rava maġamaġau, ai puru au eta i ebani ma ġelau, ai rugurugu i taratarai i ebani. <sup>9</sup> Tau i ivo vīnao ma tau i muri i nenei i garara:

"*Hosanna!*"<sup>†††</sup>

"*Viviaiainana tauna Bada au wavana e nenei!*"

<sup>10</sup> "*Viviaiainana amata David ana vigulau e nenei!*"

"*Hosanna au aidamo telerana!*"

<sup>11</sup> Iesu i ġeta au *Jerusalem* ma i rui au Tempol ma anatapuna i tuvirevirei ma au i biga au baina, i opu me au *Bet-Ani*, tau i 12 maiteni.

**Iesu damala aina i parivai-irairaġeni**

(Mat 21:18-19)

<sup>12</sup> Ma marana i tom, tau i *Bet-Ani* i oputawaneii ma Iesu am-iraġe. <sup>13</sup> Au weia ma damala aina i inana i ruguruguna. Ma i nae da ita inana i u a bo eġa.

Maranai kampa i ġeta, eġa aiwai ita nelaġai. Anina ai ruguruguna ava, au baina eġa damala ana mara.

<sup>14</sup> Iesu, damala aina i riwei i pa, "Eġa aiai amadodo ma amapo anom ina am melel!" Ma ana tauvotaġotaġo i nonori aiwai i latoni.

**Iesu, Taugimara Tempolei ivi aġaġana opune i**

(Mat 21:12-17; Luk 19:45-48; Jhn 2:13-22)

<sup>15</sup> Maranai tau i ġeta au *Jerusalem*, Iesu i rui Tempol ana au gari ma taugimara ivi aġaġana opune i, mane tauviraina <sup>†††</sup> ai kepakepa ma gabubu taugimareina ai anikiala ivi tauvirai. <sup>16</sup> Ma ivi ġae i da eġa aiai ana gimara au Tempol garina ita avarai naiei. <sup>17</sup> Ma rava ivi araramani i pa, "I girugirumia nanare, 'Au numa ina ġorei pari au numana dobu ravai anatapai au baii.'<sup>5</sup>

Wate taumi ovo virai da kwalakwalai ai guba." †††

<sup>18</sup> *Pirisi Babadai* ma *Tarawatu Babadai* i nonori ma i ogei da itavi raġeni. Tau i, Iesu i rovoei au baina patara ana viararamana i baei.

<sup>19</sup> Ma au biga i tau i, *Jerusalem* i oputawane i.

**Damala aina i poi**

(Mat 21:20-22)

<sup>20</sup> Ma ubaubanai tau i nena e ma damala aina i inana i anatapuna i poi. <sup>21</sup> Peter i notai ma i riwa "Tauviararamana ma inana! Damala aina u parivai-irairaġenia i poi."

<sup>22</sup> Iesu i paribelei, "God onavi tumaġane i! <sup>23</sup> A ririwana kauemi. Rava wei olana ita riwei, 'Mavo mairi ma au boga ma tawanem!' Ma nuanuana eġa ina raġaraġa ma tumaġana da aiwai e ririweia, ina tupua tauna au baina. <sup>24</sup> Lamna au baina a ririwemi. Aiwai au pari ovi baġei, *onavi tumaġana* da taumi boiboġi o vaia ma

†† 11:7 2 Kgs 9:12-13 ††† lamna pona Aram anona 'ma vilawaniai' ma muriai lamna viegualau ma vīmaeġaeġaena au baina. *Ps* 118 ona inana i. ††† Mai Jew ai au nota da mai Rome ma mai Greece aruai mane au tepana i terei, wei mai Jew awari lamna God morumoruna. Mane tauviraina au Tempol mane dobu ġelau i virai da Tempol mane wei lamna Jew tarawatu ivi aninei gimara au Tempol au baina (*Exo* 30.13). § 11:17 *Isa* 56:7 ††† *Jer* 7:11-15 ††† Iesu dobuġela manena tauviraina ma uneune ravai ivi wavui da tau i pari numana ivo virai da am-kwalakwalai ai guba, tau i rava ai arua nolana evivi apoapoeni *Jer* 7:11-15.



inavi ġarimiei. <sup>25</sup> Ma maranai e raraupari, au naona rava anapui ai apoapoe awarim ma nota-tawanei. Ma nanare amam au mara am apoapoe ina nota-tawanei.<sup>†</sup>

**Jew babadai, Iesu ana vibadana ivi tarapiriei**  
(Mat 21:23-27; Luk 20:1-8)

<sup>27</sup> Tau i nememei au *Jerusalem* ma Tempol ana au gari Iesu i bababara. Ma Pirisi Babadai, Tarawatu Babadai ma dogadogara i nei tauna awarina. <sup>28</sup> Ma Iesu i paridadanei i pa, "Aiwai vibadanei wei kauai e kaukauei? Aiai vibadana i verem da wei kauai uta kauai?"

<sup>29</sup> Iesu i paribelei i pa, "Au vitaraviravira tagogi ana terei ma ona paribeleu. Ma ana riwemi; aiwai vibadanei wei kauai a kaukauei. <sup>30</sup> Aiai, John Taubabataito vibadana i verei da rava ita babataitoi, God bo rava? Ona riweu!"

<sup>31</sup> Tau ivi tarapiri vivira, "Mepa da tana riwa, 'Godei.' Tauna ina riwa, 'Ma aiwai au baina eġa otavi tu-maġanei?' <sup>32</sup> Wate eġa tana riwa da, 'Ravei.'" Tau rava i rovoei, au baina rava anapui, ai nota da John anina *peroveta*. <sup>††33</sup> Ma i paribelei, "Tauai eġa ata aramanei." Iesu i riwa, "Tau nanare eġa ana riwemi aiwai vibadanei wei kauai a kaukauei."

**Tauipi ai awanaina**  
(Mat 21:33-46; Luk 20:9-19)

**12** Iesu ivi karei ma awanaini awari i babani i pa, "Mara tagogi oroto, ana wapu i kauai ma grape i paewi <sup>‡</sup> ma i gari ma grape anigudana ma violaġa numana i voai. Ma tauipi ġelau i verei da ita nolei tau i anapui au bai. Ma i vaġai au dobu ġela.<sup>2</sup> Tuaruta ana mara i ġetai ma taniwaga, ana taunola i paritawanei tauipi awarii da ana ġuta ita vaia. <sup>3</sup> Wate tauipi, tauna ivo jijini ma i kwapui ma kwakwavina i paritawanei. <sup>4</sup> Ma taniwaga, taunola ġelauna i paritawanei. Ma tau i, kolana ivi aibauni ma ivi tepaubaubai. <sup>5</sup> Ma taunola ġelauna i paritawanei ma tauna ivi raġeni ma i maġa ġelau i paritawanei, ġelau i kwapui ma ġelau ivi raġeni. <sup>††6</sup> Ma tagogi ava e mamae da ina paritawanei. Lamna natuna orotona tagotago ana nuavainana. Ma tauna au murioina i paritawanei ma i pa, 'Tau i, natu ina vivirei.' <sup>††7</sup> Wate tau i, tauna i inanai i ma i riwa vivira i pa, 'Wei taniwaga natuna. Ona nei, tanavi raġeni ma ana buderi inavi ġaritaiei!' <sup>8</sup> Ma i vunui ma ivi raġeni ma tupuana wapuei i tawanana opunei.

<sup>9</sup> "Wapu taniwagana marina aiwai ina kauai tau awarii? Tauna ina nei ma tauipi inavi raġeni ma grape wapuna ina veredamanei tauipi ġelau awari. <sup>†††10</sup> Wei girumana o iavi bo eġa?"

<sup>†</sup> riwa wadubo nonoana uraiei i girugirumia v 26 weka eġa ita mamae, (Mepa da rava ai apoapoei eġa ma nota-tawanei, amam au mara nanare am apoapoei eġa ina nota-tawanei). <sup>††</sup> 11:32 Luk 20:6 <sup>‡</sup> Parivainota wadubona, God au anapuna Israel e bababaniei me tauna ana grape wapuna, me Isa 5:1-2. <sup>††</sup> Inana Jeremiah 7:25-26, Amos 3:7 ma Zechariah 1:6. <sup>††</sup> 12:6 Mrk 1:11 <sup>†††</sup> 12:9 Luk 13:34-35

'Wei ġaimana, tauvoa i geduaiei, wate muriai i nelaġai da tauna ġaima kaua.

<sup>11</sup> Wei lamna, Bada ana kaua ma inanana ivi nu-  
alaulauna."<sup>†††</sup>

(Psa 118:22-23)

<sup>12</sup> Jew babadai i aramanei da awanaina lamna tau i bababaniei ma lamna au baina i ġoei da ita pani. Wate tau i patara i rovoei, lamna au baina Iesu ivo terei ma i nae.

**Sisa awarina tax tana terei bo eġa?**  
(Mat 22:15-22; Luk 20:20-26)

<sup>13</sup> Ma *Farisi* ġelau ma Herod ana rava ġelau i nae Iesu awarina da riwei ita waroi. <sup>14</sup> Tau i nei ma i riwa, "Tauviararamana, tauai aramanei da tam rava jijiman-im. Ma rava wavai naenaei ma rava labalababa eġa uta vibainaenaei ma anapui e vaivaia da tagogi. Wate tam God ana babani riwa kauai evi araramani. Ma riwelai tax tana terei Rome gulauna wavana *Sisa*<sup>†††</sup> awarina, i ai bo eġa?"

<sup>15</sup> Wate Iesu, ai moru i inana bauni ma i riwei, "Aiwai au baina o rau-dadaniu? Mani tagogi ona neiai da ana inanai!"

<sup>16</sup> *Denarius* tagogi i neiai Iesu awarina ma tau i taravirevirei, "Wei aiai aruana ma wavana?"

I paribelei, "*Sisa*."

<sup>17</sup> Iesu i riwa, "Aiwai *Sisa* ġarinei, *Sisa* ona verei. Ma aiwai God ġarinei, God ona verei!" Ma tau i baei.

**Sadusi ġelau Iesu ivi taravirevirei irairaġelei vomairina  
au baina**

(Mat 22:23-33; Luk 20:27-40)

<sup>18</sup> Mai *Sadusi* ai vitumaġana da rava eġa ita vo-vo mairi-me maranai e irairaġe. <sup>§</sup> Anina ma ġelau i nei Iesu awarina ma i paridadanei. <sup>19</sup> "Tauviararamana! God ana tarawatu, Moses wenanare i girumi: Mepa da oroto i iraġe ma kaiababana i netawanei ma eġa natu-natui. Orotu vareina kaiababana ina ravaġi ma roaroa ina ġuni vareina au baina. <sup>§†20</sup> Mara tagogi varevarei seven i mae. Ma natuevou i tavine ma eġa itavi natuna ma oroto i iraġe. <sup>21</sup> Vareina viruaina kaiababa i ravaġi ma tauna maiteni eġa natuna ma i iraġe. Ma nanare vareina vitonuina. <sup>22</sup> Ma nanare anapui seven, wavinena i ravaġi ma eġa natunatui. Au muriai wavine i iraġe. <sup>23</sup> Anapui seven, wavinena i ravaġi. Vomairi me au marana, lamna aiai awana?"

<sup>24</sup> Iesu, tau i riwei, "Aiwai Moses i girumi ma God ana rewapana eġa ota aramanei. <sup>25</sup> Maranai tau i iraġelei inavo mairi, tau i eġa ina tavine bo inavi tavinei. Wate ina mae me anela au mara. <sup>26</sup> Ma rava iraġelei ivo mairi babanina, Moses ana tarawatu eġa ota iavi bo? Mepa ai i araratalana, kampa God Moses i riwei: '*Tau Abraham ana God ma Isaac ana God ma Jacob*

<sup>†††</sup> Eng. Caesar. <sup>§</sup> Sadusi tau i gulagulau ma rava ġaeġaei mai Jew ai ġiu babadai tau i maiteni eġa itavi tumaġana da ANELA BO ARUA ĠELAU I MAMAE MA BUKA 5 IVI NAO, MOSES I GIRUGIRUMIA, TAU I LAMNA AVA EVIVI TUMAġANEI (GEN, EXO, LEV, NUM, DEU) MA EġA BUKA ĠELAU I. WATE MOSES MA GOD RIWAIEI TAU IVI ATATAIEI DA LAWANA E MAMAE IRAġE AU MURINA. <sup>§†</sup> 12:19 Deu 25:5-6

ana God.<sup>†27</sup> Tauna eġa rava i irairaġei ai God, wate rava lawalawai ai God. Taumi o moru kaua! ††

### Tarawatu ġeġetelarana (Mat 22:34-40; Luk 10:25-28)

<sup>28</sup> Ma Tarawatu Badana tagogi i nae ma ai vitarapiri i nonori. Ma i nonori da Iesu i babani kaua, lamna au baina tauna ivi taraviravira, "God ana tarawatu metau-na i ġetelara?"

<sup>29</sup> Iesu i paribelei, "Ġeġetelarana tagogi lamna wei: 'Ona rau-taniġana Israe! Bada ata God, tauna ava Bada. <sup>30</sup> Bada ami God nuanuami ina vaia orami anata-pune i ma aruami anata-pune i ma ami nota anata-pune i ma ami rewapana anata-pune i!<sup>†31</sup> Ma viruaina lamna wei: 'Rava ġelau i nuanuam ina vaia me tam nuanuam e vaivai-melei!<sup>†41</sup> Wei tarawatu i ruaġa i ġetelara, eġa me ġelau i nanare."

<sup>32</sup> Tarawatu badana i riwa, "Tauviararamana u babani kaua! Riwa kaua u babaniei, God 'Tagogi ma eġa mepa ġelauna.<sup>††33</sup> Ma 'nuanuami ina vaia orami anata-pune i ma ami nota anata-pune i ma ami rewapana anata-pune i.' Ma, 'Rava turam nuanuam ina vaia me tam nuanuam e vaivai-melei.' Wei tarawatu i ruaġa lamna i ġetelara, eġa me pulo apuapunana bo pulo ġelau i."

<sup>34</sup> Iesu i inanai da tauna i paribelana kaua ma i riwei, "Tam, God ana vigulau au ġereġerena e ġeġeta." Ma eġa aiai tepana ita tora da Iesu itavi taraviravirana melei.

### Keriso tauna aiai? (Mat 22:41-46; Luk 20:41-44)

<sup>35</sup> Maranai Iesu au Tempol ivi araramana ma ivi taraviravira i pa, "Aiwai au baina **Tarawatu Babadai** e riri-wa da **Keriso** tauna **David** natuna? <sup>36</sup> **Arua Vivivireina**, David nota i verei ma tauna i riwa:

'Bada au bada i riwei,

Au oieu ma kiala

da am ġavia

au ae-karem ana tuvai-doedoei.'

(Psa 110:1)

<sup>37</sup> "David, tauoina i ġorei 'Bada.' Ma menanare da **Keriso** lamna, David natuna?" Patara ġaeġaena riwana i nonori ma ivi nuaiai.

### Iesu, Tarawatu Babadai ai kaua i babaniei (Mat 23:1-36; Luk 20:45-47)

<sup>38</sup> Ma Iesu, tau i ivi araramani i pa, "Tarawatu Babadai ona rovoei. Ai gara manamanai ma e bababara nae au deba da rava tau i evivi virei. <sup>39</sup> Tau i anikiala vinevinei **pari au numana** ma au torela, gabu aiaii e vaivaia.

<sup>40</sup> Tau i, kaikaibaba e morumorui ma ai numa e kwalekwalei ma e morumoru ma e raraupari vaimanamanawa. Tau i ai kovoġa ina apoapoe ġur-ratana."

† 12:26 Exo 3:6 †† 'wate rava lawalawai ai God' mepa da God i riwa da tauna Abraham ma Isaac ma Jacob ai God tau i lawalawai maranai God, Moses awarina i babani. ‡ 12:30 Deu 6:4-5 †† 12:31 Lev 19:18 †† 12:32 Deu 4:35

### Kaiababa ana pulo (Luk 21:1-4)

<sup>41</sup> Ma Iesu, pulo aniterenana au baba ġelauna i kiala ma rava i inanai mane i tereterei. Rava maġamaġau i vivimanei, mane maġamaġau i terei. <sup>42</sup> Wate kaiababa molamolakana i nei ma mane muomuoi ruaġa i terei, ruvana i aburu kaua. <sup>43</sup> Ana **Tauvotaġotaġo** i ġorei ma i riwei, "Anina a ririwemi, wei kaiababa molamolakana i tere guratei, eġa me tau i ġelau i. <sup>44</sup> Tau i ġelau i ai mau-rei i verena, wate wei kaiababa molaka ma ġarinei anata-puna i terei ana anilawana anata-puna.

### Iesu i riwa da rava God ana Tempol ina rikai (Mat 24:1-2; Luk 21:5-6)

**13** Iesu, Tempol i nenetawanei ma ana tauvotaġotaġo tagogi i riwa, "Tauviararamana! Numa ivi ġulau ġaġa ma numa ġaimai i rata ġaġa."

<sup>2</sup> Iesu i paribelei, "Wei numai ġaeġae i inanai, eġa ġaimai tagogi, turana au tepana ina mae. Ġaima anata-pui ina rikai."

### Rava ina vinua-apoapoe kaua. Iesu ana tauvotaġotaġo inavi patutu (Mat 24:3-14; Luk 21:7-19)

<sup>3</sup> Iesu i kiakiala au ola *Olives*, Tempol au nanavanaġela ma Peter, James, John ma Andrew i nei ma ivi taraviravirana govaġei <sup>4</sup> i pa, "Ma riwelai mara aiwai wei kauai ina tupua? Ma aiwai inavi mataira da wei kauai anata-pui ina tupua?"

<sup>5</sup> Iesu, tau i riwei, "Ona inana kaua da eġa aiai ina tere-vaideġaimi! <sup>6</sup> Rava maġamaġau, au wavau ina nei ma ina riwa, 'Tau **Keriso!** Ma rava maġamaġau ina tere-vaideġai. <sup>7</sup> Ma maranai viġavia ona nonori ma viġavia aueia riwana ona nonori; eġa ona rovo. Wei kauai anina da ina tupua, wate wei eġa damona. <sup>8</sup> Dam, damai inavi ġavia vivira ma dobu, dobuai in-avi ġavia vivira. Ma lolo ma gomara dobu au anata-puna. Wei kauai, lamna me wavine ana iniviera evivi karei maranai evivi natuna.

<sup>9</sup> "Ona inana kaua! Taumi ina panimi ma ina etaremi ma pari au numana au orana ina kwapuimi. Ma dogadogara ma gulagulau au naoi ona mairi, au baina taumi ovo taġotaġoiu. Ma tau i awarii, Riwa Aiaina ona rau-gugulei. <sup>10</sup> Riwa Aiaina ona rau-gugulei rava anata-pui awari ma muriai damona ina nei. <sup>11</sup> Ma maranai i panimi ma i etaremi. Eġa onavi nuabola da aiwai ona latoni. Aiwai riwana God i veremi, lamna ona latoni. Aiwai o latoni lamna eġa taumi ota babani, wate **Arua Vivivireina**. <sup>12</sup> Rava, vareina ina verenei da inavi raġeni. Ma ama, natunatuna ina verenei da in-avi raġeni. Ma roaroa, amamai ma aloloi inavi ġaviei da ina iraġe. <sup>13</sup> Rava anata-pui ina geduaiemi tau au baiu. Wate aiai da e maimairi jijina da au damona, tau-na ina lawana.

## Iniviara ġaeġaena ana mara

(Mat 24:15-28; Luk 21:20-24)

<sup>14</sup> “Maranai ‘Kaua apoapoe kaukauana’<sup>†</sup> e maimairi mepa avena ita mairi. (Buka tau-iavana wei ina aramane i anona aiwai). Tai aiavoi au *Judia* ina ruba laġi-laġina au ola. <sup>15</sup> Ai ai numa au tepana eġa ina ġaira bo ina rui au numa da aiwai ina vaia. <sup>16</sup> Ai ai au wapu eġa ina nae me au numa da ana gara ina vaia. <sup>17</sup> Ma iniviara ġaeġaena, waivine duaduamai ma tau i da evivi ġuġu awari nai au marana! <sup>18</sup> God awarina ona raupari da wei kauai eġa au bodu ina tupua. <sup>19</sup> Ma nai au marana amapo iniviara ġaeġaena. Ma maranai God dobu i kauai, iniviara ġaeġaena eġa nanare ita tupua ma amapo eġa nanare ina tupua me. <sup>20</sup> Wate Bada nai marana inavi tupoi. Mepa da eġa inavi tupoi, rava anatapai ina iraġe. Wate rava, tauna ana vinevine inavi lawani lamna au baina mara inavi tupoi.

<sup>21-22</sup> “Muriai keriso morumorui ma *peroveta* morumorui ina nei ma mataira ma *kaua babai* ina kauai ma ina kauana dadanei da God ana vinevine maiteni ita tere-vaideġai. Lamna au baina mepa da ai ai ina riwemi, ‘Ma inana, *Keriso* noi!’ bo ‘Tauna noi!’ Nai babanina eġa onavi tumaġanei! <sup>23</sup> Ona inana kaua; anatapuna a riwana nonoemi!”

## Rava Natuna ana nei

(Mat 24:29-31; Luk 21:25-28)

<sup>24</sup> Iesu wenanare i riwa, “Ma iniviara ġaeġaena au murina.

*‘Madeġa eġa ina rarana  
ma nawaravi eġa ina lalai.’*

(Isa 13:10)

<sup>25</sup> *‘Ma ubona marei ina peu  
ma rewapana ġelau i au aidamo ina gui.’*

(Isa 34:4)

<sup>26</sup> “Nai maranaina, ‘Rava Natuna ana rewapanana ma ana borumana apauei ina nei.’<sup>††27</sup> Ma Tauna, ana *anela* ina paritawane i dobu au anatapuna da rava tauna ana vinevine ina tuarui dobu au damona da dobu ġela au damona.”

## Damala ana awanaina

(Mat 24:32-35; Luk 21:29-33)

<sup>28</sup> “Damala aina ana awanaina ona aramane i. Maranai ai e numonumoi, lamna ona aramane i da maura e tuturiai. <sup>29</sup> Ma nanare, maranai wei kauai anatapai ina tuputupua, ona aramane i da *Rava Natuna* i turia i; au metaeta i ġetai. <sup>30</sup> Anina a ririwemi da wei kauai au naona ina tupua ma muriai da rava marina lawalawai ina iraġe. <sup>31</sup> Mara ma dobu ina amoa. Wate riwau eġa ina amoa.”

## Tana vokaukaua Iesu ina nememei au baina

(Mat 24:36-44)

<sup>32</sup> “Ma eġa ai ai ita aramane i nai marana bo madeġa aiwai ina nei. Anela au mara eġa ita aramane i ma Natuna eġa ita aramane i. Amana, tauna ava i aramane i. <sup>33</sup> Onavi neneġana ma matami ina kala! <sup>†</sup> Eġa ota aramane i mara aiwai, wei kauai ina tupua. <sup>34</sup> Wei me rava ana numa i netawane i ma i vaġai. Ma ana taunola nununai i terei da itavi pai pai ma tagotago-gi ava ai nola i verei da ita kauai. Ma metaeta taupainina i riwei da itavi neneġana. <sup>35</sup> Onavi neneġana! Eġa ota aramane i mara aiwai, numa taniwagana e nenei; mepa da au bigai bo au nubautuva bo maratomtomi bo ubaubanai. <sup>36</sup> Mepa da ina nelaġilaġinai, eġa matamatavemi ina nelaġaimi. <sup>37</sup> Aiwai riwana a ririwemi, riwana tagogina rava anatapai a riwei, onavi neneġana!”

## Jew ai babada, Iesu i ogei da itavi raġeni

(Mat 26:1-5; Luk 22:1-2; Jhn 11:45-53)

**14** Au pom ruaġa muriai da *Raġona* ma *Palawa Bagibagina* torelai, <sup>††</sup>*Pirisi Babadai* ma *Tarawatu Babadai* eta i baibaiei da menanare govagovaġanei Iesu ita vunui. <sup>2</sup> Ma i riwa, “Au torela wei kauai eġa tana kauai, mepa da viġaiġaiawa ġaeġaena ina tupua.”

## Wavine, daji ġabuġabuna Iesu au kolana i waġi

(Mat 26:6-13; Jhn 12:1-8)

<sup>3</sup> Maranai Iesu au *Bet-Ani*, Simon i ġoreġorei *Iep-eleperana* ana au numa i kiala ma i amam. Wavine, wagi wavana alabaster i voai ma i ġeta ma wagi uana ivo ġai ma daji ġabuġabuna, maiana ġaeġaena e ġoreġorei *nard*, Iesu au kolana i waġi. <sup>4</sup> Rava ġelau i kampa i mammae i ġaiawa ma i riwa, “Aiwai au baina daji uvi kalokaloei? <sup>5</sup> Wei dajina ita gimarei 300 *denarii* <sup>††</sup> ruvana ma manena molamolakai ita verei.” Ma tau i, wavine ivi enenei.

<sup>6</sup> Wate Iesu i riwa, “Onavo terei! Aiwai au baina ovi nuabolai? Tauna, kaua aiaina awariu i kauai. <sup>7</sup> Molamolakai awarimi e mammae nonoa ma ona ġoei ma tau i ona voagui. Wate tau awarimi eġa ata mammae nonoa. <sup>8</sup> Wavine ana nola i kauai. Tauna, dajiei tupuau ivo kaukauana nonoei vikokoaga au baina. <sup>†††9</sup> A ririwana kauemi, mepa Riwa Aiaina i rau-gugulei dobu au ana tapui, wei wavinena aiwai i kaukauei ina babanie i, ma eġa nuanuai ina vuru.”

<sup>10</sup> Judas *Iskariotei* tauna 12 tagogi, Pirisi Babadai awari i ġeta da Iesu itavi benabename i. <sup>11</sup> Tai ivi nuai i kaua maranai wei i nonori ma Judas i parivai-nuaġani da mane ita verei. Ma Judas i inana da mepa gavogavo ita inana i da Iesu ita amverenei.

<sup>†</sup> *Wedau Evanelia i girumi, ‘ma i raupari,’ wate buka wadubo nonoana wei eġa ita mammae, Luk 21:16 kampa ona inana i da e mammae. <sup>††</sup> Raġona/passover Exo 12:1; Palawa Bagibagina/Unleavened Bread Exo 12:17; 23:15 <sup>††</sup> Wei lamna me taubagibagi ana maia madeġa tagogi au baina. <sup>†††</sup> Mai Jew ai kaua da taubeu dajiei e bulobulo i muriai au kokoaga e teretere i.*

<sup>†</sup> Eng. Abomination of Desolation Dan 9:27, 11:31, and 12:11  
<sup>††</sup> 13:26 Dan 7:13

## Iesu ma tau i 12 Raġona torelana i ani.

(Mat 26:17-25; Luk 22:7-14, 21-23; Jhn 13:21-30)

<sup>12</sup> Ma *Palawa Bagibagina* torela inavi karei. Maranai *sipu* orotoi ġauboi e vunuvunui *Raġona* torelana au baina. Tauvotaġotaġo, Iesu i paridadanei, "Mepa u ġoeġoei Raġona torelana anavo kaukauei au baim?"

<sup>13</sup> Iesu, tau i ruaġa i riwei ma i paritawanei, "Ona nae au *Jerusalem* ma oroto, waira wagina e avavarai ona inana ma onavo taġotaġoi. <sup>14</sup> Au numana e ruiuriana, numa taniwagana ona riwei, 'Ai tauviararamana i riwa. Numa vokaukauana mepa ma au Tauvotaġotaġo maiteni Raġona torelana ana ani?' <sup>15</sup> Ma tauna, numa vatavata inavi atataiem i vo kaukauana noanoi ma kampa au baita ona vokaukaua."

<sup>16</sup> Tauvotaġotaġo i nae au *Jerusalem* ma i ririweia nanare i nelaġai ma Raġona torelana i vo kaukauei.

<sup>17</sup> Au i biga ma Iesu i nei tau i 12 maiteni. <sup>18</sup> Tau i au kepa kepa i amam ma Iesu i riwa, "Anina a ririwemi. Taumi tagogi inavi benabenameu; tagogi weka maiteni amam." †

<sup>19</sup> Tauvotaġotaġo i vi nuabola ma tagotagogiava i pa, "Eġa tau tapa?"

<sup>20</sup> Iesu i paribelei, "Taumi tagogi weka palawa evivi galoi au aboma tau maiteni. <sup>21</sup> Wariaġa i girugirumia nanare, *Rava Natuna* ina iraġe. Wate aia da Rava Natuna i vi benabenamei; tauna, kovoġa ġaeġaena ina vaia! I ai da alona avena itavi natunei."

<sup>22</sup> Maranai i amam ma Iesu palawa i vaia ma i vi egualau, i vo gimagimai ma Tauvotaġotaġo i verei ma i riwa, "Ona vaia; wei tupuau."

<sup>23</sup> Anina ma *wine* kelakana i vaia ma i vi egualau ma i verei da anatapai i umei. <sup>24</sup> "Wei tau tarau i toi rava maġamaġau i au bai ma au *parivai-nuaġana bagibagina* ina vovai-virewapani. †<sup>25</sup> Anina a ririwemi, *wine* eġa melanai ana uma melei da maranai *wine* vouna ana umai God ana au vigulau."

<sup>26</sup> Ma tau i voepaepa welana i ravi ma i ġae au *Ola Olives*.

## Peter, Iesu ina boviei

(Mat 26:31-35; Luk 22:31-34; Jhn 13:36-38)

<sup>27</sup> Iesu, tau i riwei "I girumi nanare, God i riwa, '*Tauviġamoġamo anavi raġeni ma sipu in-avi lamonei*.'"

(Zec 13:7)

Ma nanare anatapumi ona ruba tawaneu. <sup>28</sup> Wate au vomairi au murina ana aivinao au *Galili*." ‡

<sup>29</sup> Peter i riwa, "Mepa da anatapai ina ruba tawanem, wate eġa tau!"

<sup>30</sup> Iesu, Peter i riwei, "A ririwana kauem da amadodo waguvarai muria da kokorereko ina tou mara ruaġa; tam mara tonuġa ma bovieu."

<sup>31</sup> Wate Peter, ponana i bagibagi ma i riwa, "Avena mepa da tau, tam maiteni ana iraġe. Eġa melanai ana boviem!" Ma tau i ġelau i rirwana tagogina i latoni.

## Iesu au Getsemani i raraupari

(Mat 26:36-46; Luk 22:39-46)

<sup>32</sup> Ma au *Getsemani* i ġeta ma Iesu, ana tauvotaġotaġo i riwei, "Weka ona kiala ma ana raupari." <sup>33</sup> Ma Peter, James ma John i taravaini ma nuanuana i iraġe ma nuanuana i bola-kauei. <sup>34</sup> Ma tau i riwei, "Au nuabola i rata kaua au orau da e vunuvunui. Weka ona mae ma onavi neneġana."

<sup>35</sup> Ma aburuna i veraunae ma au doa i peu ma i raupari da mepa da tagotagogina, lamna wei marana apoapoena tauna ita netawanei. <sup>36</sup> I riwa i pa, "*Abba* Amau! Aiwai anatapuna tagotagogina tam awarim. Wei kovoġa kelakana ma vaitawanei. Wate eġa tau au ġoana, wate tam am ġoana."

<sup>37</sup> Ma Iesu i nememei ma tau i tonuġa rarau-nuavurui i nelaġai. Ma Peter i riwei, "Simon! †† tam aiwai matave-na? Mara aburuna utavi neneġana bo eġa?" <sup>38</sup> Ma Iesu, tau i riwei, "Onavi neneġana ma ona raupari da eġa au raelara ona peu! Arua e ġoeġoei, wate tupua i ġokokokara."

<sup>39</sup> Ma i nae me ma parina tagogina i raupariei.

<sup>40</sup> Maranai i nememei ma i nelaġai, i matamatave; tau i matai i vitai. Ma tau i eġa ita aramanei aiwai ita riwei.

<sup>41</sup> Mara vitonuina i nenememei ma tau i riwei, "Tau mi amapo ona matamatave ma laumi ina tautau? Anina! Mara i ġetai, ona inana. *Rava Natuna* inavi benabenamei ġoa-apoapoe ravai au urai. <sup>42</sup> Onavo mairi; tana nae; ona inana! Tauvibenabenameu e nenei!"

## Iesu i pani

(Mat 26:47-56; Luk 22:47-53; Jhn 18:3-12)

<sup>43</sup> Iesu i bababani ma Judas, tauna Tauvotaġotaġo tagogi i ġetai. Tauna, patara maiteni i nei ana apiai. Pirisi Babadai ma Tarawatu Babadai ma dogadogara, wei ravai i paritawaneiai. <sup>44</sup> Muria da Iesu awarina ita ġeta; Judas, patara ai mataira i verei, "Orotona anavi gialaġolaġonei; nai tauna. Ona pani ma ona naiei ma ona inana kauei!"

<sup>45</sup> Maranai Judas i ġeta ma i nae Iesu awarina ma i riwei, "Tauviararamana!" Ma i vi gialaġolaġonei. <sup>46</sup> Ma tau i Iesu i vi jijini ma i pani. <sup>47</sup> Ma tagogi kampa i maimairi, ana sword i taina lavui ma Pirisi ġeġetelarana ana taunola taniġana i borituini. <sup>48</sup> Ma Iesu, tau i riwei, "Taumi ana apiami o nei da ota panu bo, apamina tau am-kwalakwalau? <sup>49</sup> Mara patapatai tau mi maiteni ta mamae au Tempol ma avi araramana ma eġa ota panu. Ma riwa i girugirumia nanare, ina tupua." ††

<sup>50</sup> Ma Tauvotaġotaġo anatapai, Iesu i vi terei ma i rubatawanei.

<sup>51</sup> Ma laraga tagogi, gara maiana ġaeġaena i vi karekoei ma Iesu i vi taġotaġoi. Tau i vi ġoei da itavo jijini, <sup>52</sup> wate tau i ana kareko i vi jijini ma ana kovakovana i ruba.

† 14:18 Psa 41:9 †† 14:24 Gen 17:2; Gen 17:7-9; Exo 24:8; Jer 31:31-34 ‡ 14:28 Mat 28:16

†† Au Mk 3:16 Simon wavana i virai da Peter. †† 14:49 Luk 19:47; 21:37

**Tauī, Iesu i etarei.**

(Mat 26:57-68; Luk 22:54-55, 63-71; Jhn 18:13-14, 19-24)

<sup>53</sup> Ma tauī, Iesu i naiei Pirisi Ġeġetelarana, Pirisi Babadai, dogadogara ma Tarawatu Babadai mepa ivi tagogieiana. <sup>54</sup> Ma Peter ivo taġotaġo da Pirisi ġeġetelarana ana numa. Ma ana au debadeba, tauvi pai pai maiteni i kiala ma au ai ivivi airara. <sup>55</sup> Pirisi Babadai ma mai Jew ai boru ġeġetelarana, † Iesu ana apoapoe i baiei da itavi raġeni; ma i baiana avei. <sup>56</sup> Matamata maġamaġauī, Iesu ivi wavu morumoruei, wate ai viwavu taputapunei ava.

<sup>57</sup> Ma ġelauī ivo mairi ma wei wavuna morumoruna i kauē Iesu awarina. <sup>58</sup> "Tauai a nonori tauna i riwa, 'Wei Tempolna rava i voavoai. Tau ana rikai ma au pom tonuġa au murina, Tempol ġelauna ana voai ma lamna eġa rava ita voai. ††" <sup>59</sup> Wate nanare ai viwavu taputapunei ava.

<sup>60</sup> Pirisi ġeġetelarana i mairi tauī au naoi ma Iesu ivi taravirevirei, "Wei ravai evivi wavuim ma eġa aiwai ma paribelei bo?"

<sup>61</sup> Ma Iesu i genuana ma eġa ita paribelei. ‡ Ma Pirisi ġeġetelarana ivi taraviravirana meleī, "Tam Keriso bo? Viviaianana Natuna bo?"

<sup>62</sup> Iesu i paribelana, "Tau tauna! Ma 'Rava Natuna ona inanai, Vivirewapanana au oiena ina kiala' ma 'mara ladanei ina nei. ††"

<sup>63</sup> Pirisi ġeġetelarana, amlona i ġaiġai ma ana gara i sikai ma i riwa, "Aiwai au baina matamata ġelauī tana ġoei? <sup>64</sup> Taumi, vijiboġa ‡ o nonori ma ami nota aiwai?"

Tauī anapui i riwa, "Tauna ana ġoa-apoapoe au baina anina da ina iraġe!"

<sup>65</sup> Ma ġelauī i rau-karei ma Iesu i ovai ma naona i purui; i rau-navanavai ma i riwei, "Ma pariverelai, aiāi i ravim!" Ma tauvi pai pai, Iesu i vaia ma i vunui.

**Peter Iesu i boviei**

(Mat 26:69-75; Luk 22:56-62; Jhn 18:15-18, 25-27)

<sup>66</sup> Ma Peter au gabaura i mamae ma Pirisi ġeġetelarana ana taunola guguini i ġetai. <sup>67</sup> Maranaī tauna, Peter i inanai ivivi airara; ma i inanatunutunui ma i riwa, "Tam maiteni Iesu Nasaretei, ana tauvotaġotaġo."

<sup>68</sup> Wate tauna i bovi ma i riwa, "Eġa ata aramanei aiwai e bababaniei, avi nuanainei!" Ma i tuopu au metaeta ma [kokorereko i tou ‡†].

<sup>69</sup> Taunola guguini, Peter i inanai ma i rau-karena meleī ma rava au ġereġere i maimairi i riwei, "Wei ravana, tauī tagogi!" <sup>70</sup> Wate Peter i bovi me.

Mara aburuna muriai, tauī au ġereġere i maimairi, Peter i riwana meleī, "Tam anina, tauī tagogi; au baina tam, Galiliei!" <sup>71</sup> Ma Peter i riwa, "God au matana, tau a ririwa kaua, ravana o ririweia avivi nuanainei!"

† mai Jew e ġoreġorei Sanhedrin. †† 14:58 Jhn 2:19 ‡ Isaiah i parivereta da KERISOANA au iraġe eġa ina gagaloana meleī. (Isa 53.7). †† 14:62 Dan 7:13 ‡† 14:64 Lev 24:16 ‡†† Wei riwana buka au wadubo nonoana eġa ita mamae.

<sup>72</sup> Maratagogi kokorereko i tou mara viruaina ma Peter, Iesu riwana i notai, "Muriai da kokorereko ina tou mara ruaġa, tam mara tonuġa ma boviu." Ma Peter ivi nuabola kaua ma i tou.

**Iesu i taravaina naiei Pilate au naona**

(Mat 27:1-2, 11-19; Luk 23:1-5; Jhn 18:28-38)

**15** Ubaubanaī boiboġi, Pirisi Babadai ma dogadogara ma Tarawatu Babadai anapui ivi boru ‡† ma ivi anina da Iesu i pani ma i veredamanei Pilate au urana. <sup>2</sup> Pilate, Iesu ivi taravirevirei i pa, "Tam mai Jew ai Wavalatona bo?" Iesu i paribelei i pa, "Anina e ririwa nanare." <sup>3</sup> Pirisi Babadai evivi wavuim kaua maġamaġauī au bai. <sup>4</sup> Ma nanare Pilate, Iesu ivi taraviravirana meleī i pa, "Tam ma paribelana bo eġa? Ma nonori evivi wavuim kaua maġamaġauī au bai!" <sup>5</sup> Wate Iesu i genuana ma eġa ita paribelei. Ma Pilate i ba kaua. <sup>5</sup>

**Iesu ana iraġe ivi aninei**

(Mat 27:15-38; Luk 23:13-25; Jhn 18:39-19:16)

<sup>6</sup> Tauī ai kaua maemaena da Raġona Torelana au marana, Pilate, panipani tagogi, rava ai ġoanei e rupe-rupeni ma evovo terei da e nenaē. <sup>7</sup> Oroto tagogi wavana Barabas; tauna Rome gabemani ivi ġavieī ma i pani da panipani au numana i mamae. Ana rava maiteni tauī tauviraġena. <sup>8</sup> Ma patara i ġeta da Pilate itavi baġai da panipani tagogi ita rupeni Raġona Torelana au marana. <sup>9-10</sup> Pilate i paribelei, "Taumi o ġoeġoei da mai Jew ai wavalatona ana rupeni au baimi bo?" Pilate i aramanei da Pirisi Babadai, Iesu i unurei ma lamna au baina Iesu i veredamanei tauna awarina. <sup>11</sup> Wate Pirisi Babadai, patara i egari da Pilate, Barabas ita rupeni ma eġa Iesu. <sup>12</sup> Pilate, patara i paridadana meleī i pa, "Tauna o ġoreġoreia mai Jew ai wavalatona mena ana kauanei?" <sup>13</sup> Tauī i garara, "Ma tuparatui!" <sup>14</sup> Pilate i riwa, "Aiwai apoapoe i kauēi?" Ma tauī i garara guratana, "Ma tuparatui!" <sup>15</sup> Pilate i ġoei da patara itavi nuau bai ma Barabas i rupeni ma sorodia i egari da Iesu i kwapui ma i naei da ita tuparatui.

**Sorodia Iesu ivi namei**

(Mat 27:27-31; Jhn 19:2-3)

<sup>16</sup> Sorodia, Iesu i taravaina ruiei Pilate ana au numa ma ai rava ġelauī i ġoreiaī. <sup>17</sup> Ma gara lebalebarina ‡†[me wavalatona ana gara] Iesu ivi oteni ma kunuteia ai donadonanei i viri da au kolana i terei. <sup>18</sup> Ma vina-mana i rau-karei ma i garara, "Egualau mai Jew ai wavalatona!" <sup>19</sup> Ma kolana gonuei i raviravi ma i ovai. Ma ae-tutuieī i mae ġaira au doa ma i raudunelei. <sup>20</sup> Ma ivi jiboġa vorovei ma gara lebalebarina ivo ġiġi-tawaneī ma ana gara ivi oteni. Ma i taravaina opuneī da ita tuparatui

‡†† Mrk 14:55 Sanhedrin § Mai Rome ai tarawatu e mamae da maranaī ivi wavuim ma tauetara eġa uta paribelei lamna tam anina wavu ma varai. ‡† Pona English 'purple'

## Iesu i tuparatui

(Mat 27:32-44; Luk 23:26-43; Jhn 19:17-37)

<sup>21</sup> Tau i nenaē ma Simon i nelaḡai, rava *Sairinie*<sup>†</sup> (tauna Rufus ma Alexander amai). Simon wapuei i nenei. Ma *sorodia*, tauna i egari da Iesu ana *korosi* i avarai. <sup>22</sup> Tau i naiei da gabu i ḡoreḡorei *Golgotha*, lamna anona unu gabuna. <sup>23</sup> *Sorodia*, *wine* buna ma *myrrh* maiteni i virai ma Iesu i veredadani, wate tauna i geduaiei. <sup>24</sup> Ma Iesu i tuparatui ma ana gara, tau i ava au orai i ḡutai<sup>††</sup>

<sup>25</sup> Ubaubana i 9 kilok nanare, Iesu i tuparatui. <sup>26</sup> Anivi-wavuna i girumi ma i tutui, "Mai *Jew* ai wavalatona." <sup>27-28</sup> Danedanenei ruaḡa, Iesu maiteni i tuparatui; tagogi au oiena ma ḡelauna au kelakelauna. †

<sup>29</sup> Taubabara, kolai i kwajikwajiei ma Iesu ivivi namei, "Na! tam, Tempol taurikaina ma au pom tonuḡa ma ma voa melei. <sup>30</sup> Mavi lawana melem ma *korosiei* ma ḡairai!"

<sup>31</sup> Ma nanare Pirisi Babadai ma Tarawatu Babadai maiteni, Iesu ivivi namei, "Rava ḡelau i vi lawani, wate ainelana itavi lawana melana avei. <sup>32</sup> *Keriso*, Israel ana Wavalatona; marina *korosiei* ma ḡairai ma tana inana i da tanavi tumaḡanei!" Danedanenei i tupatuparatui maitenai, Iesu ivi namei.

## Iesu ana iraḡe

(Mat 27:45-56; Luk 23:44-49; Jhn 19:28-30)

<sup>33</sup> Ma au benai dobu anapapuna i waguverei da 3 kilok au bigai. <sup>34</sup> Lamna maranaina Iesu ponana i rata ma i kwatu, "*Eloi, Eloi, lama sabachthani?*" Lamna anona: "*Au God, au God aiwai au baina u netawaneu?*"<sup>††35</sup> Ma rava ḡelau i au ḡereḡere i maimairi i nonori ma i riwa, "Ona rau-taniḡanei, Elijah e kwatuk-watuei!" <sup>36</sup> Ma rava tagogi i ruba da gara ai au damona i pani ma au *wine* tomatomana ivi galoi ma ivo epai Iesu au ipirina ma i riwa: †† "Onavi pai pai ma tana inana i mepa da Elijah ina nei da ina tereḡairei." <sup>37</sup> Ma Iesu ponana i rata ma i kwatu ma i lavutu tawanana. <sup>38</sup> Ma Tempol au orana anitereḡaḡara au pouna i wanasikai au tepana da i ḡaira au doa. <sup>39</sup> Ma *sorodia* ai bada, Iesu au naona i maimairi; i inana i da i lavutu tawanana ma i riwa, "Wei anina God Natuna." <sup>40</sup> Waivine ḡelau i aueia i mae ma i raraubiga: Mary *Magdaline* ma Mary (James keikeina ma Josēs ††† aloi) ma Salome. <sup>41</sup> Tau i Iesu ivo taḡotaḡoi ma ivovo agui marana i au *Galili* i mamae ma waivine ḡelau i maḡa-maḡai, tauna maiteni i ḡeḡae au *Jerusalem*, anapapui kampa.

† Eng. Cyrenian. †† Tau i ḡaima i tawane i me 'dice' da aiwai aiwai garana ita vaia. † Giruma ḡelau i waduboi verse 28: e mamae 'Ma aiwai i kaukaueia lamna peroveta i ririweia i tupua, "Tau i inana i me tau i ḡoa-apoapoe taukauei." ' (Isa 53:12) †† Ps 22:1 †† Psalm 69:21 peroveta i girumi da *Keriso* ita verei. ††† Au Matthew 27:56, Matthew i girumi Joseph ma eḡa Josēs.

## Iesu ivi kokoagei

(Mat 27:57-61; Luk 23:50-56; Jhn 19:38-42)

<sup>42-43</sup> Ma au biga i tuturiai Joseph *Arimatiei*,<sup>†††</sup> tauna rava ḡaeḡaena tagogi boru ḡetelarana au orana. Tauna God ana vigulau ana nei ivi pai paiei. Ma vokaukaua marana (Lamna *Sabate* au naona)<sup>§</sup> ma Joseph ana tepatorana, *Pilate* awarina i rui ma Iesu tupuana ivi baḡei. <sup>44</sup> *Pilate* i baei da Iesu boiboḡi i iraḡe. Tauna, *sorodia* ai bada i kwatuei ma ivi taravirevirei da Iesu i iraḡe bo eḡa? <sup>45</sup> Marana i *sorodia* ai bada i pariverei da anina riwa kaua. Ma *Pilate*, Joseph i riwei da Iesu tupuana i vaia.

<sup>46</sup> Joseph, gara maiana ḡaeḡaena i gimara i ma Iesu tupuana i tereḡairei. Gare i umai ma au guba tupuana ivi mataveni ma ḡaima ḡaeḡaena i kaipeuri da kokoga metaetana ivi aitomeni. <sup>47</sup> Mary *Magdaline* ma Mary - Josēs alona i inana i mepa Iesu tupuana ivi mataveni.

## Iesu ivo mairi

**16** Ma *Sabate* au murina, Mary *Magdaline* ma Mary - James keikeina alona ma Salome, buna ma ḡabuḡabui i gimara i da ita naiei Iesu tupuana ita buloi. <sup>§†2</sup> Ma Sunday ubaubana i boiboḡi marana i madeḡa i gogogo, tau i nae au kokoaga. <sup>3</sup> Ma i nenaē ma i bababani, "Ai ai au baita ḡaima kokoaga au metaetana ina kaipeura tawane i?" <sup>4</sup> Marana i tau i tae-pai, i inana i da boiboḡi ḡaima i kaipeura tawane i - ḡaima ḡaeḡae kaukauana. <sup>5</sup> Marana i rui au orana ma oroto laragana i inana i au oiena. <sup>§††</sup> Ma tau i orai i aue-pai. <sup>6</sup> Tauna i riwa, "Eḡa orami ina auepai, taumi, Iesu *Nasarete* o baibaiei bo? I tupatuparatuia; tauna ivo mairi! Ona inana, tauna eḡa weka! Tau i weka tupuana ivi mataveni. <sup>7</sup> Marina ona nae ma ana tau-votaḡotaḡo ona riwei, ma Peter eḡa nuanuami ina vuru da Iesu evi vinoa au *Galili*. Kampa ona inana i riri-wemi nanare." <sup>8</sup> Tau i opu ma kokoagei ivi ruberubei ana ini sisisi ma ana rovoi. Tau i rovo kaua, lamna au baina eḡa rava ita riwei.

Mark 16:9-20 <sup>§†</sup>

## Iesu Mary Magdalene awarina i eḡa

<sup>9</sup> Iesu iraḡelei ivo mairi me au Sunday ubaubana i boiboḡi ma i ainae da Mary *Magdaline* awarina i eḡa. Maraotai Iesu, Mary awarina arua-apoapoei seven

††† Eng. Arimathea. § Mai *Jew* ai *Sabate*, madeḡa e neneulai au Friday evivi karei da madeḡa e neneulai au Saturday e kwakwa. Mai *Jew* ai Tarawatu e ririwa da rava i iraḡe lamna marana tagogina ina doboi. *Sabate amadodo madeḡa e neneulai inavi karei lamna au baina Joseph ivo laḡilaḡina da Iesu taubeuna ita doboi.* §† Mai *Jew* ai kaua maemaena da taubeu monamonei ina buloi ma muriai ina doboi ma waivine i ḡoei da wei kauai itavo taḡotaḡoi.

§†† Tupua ivi mataveni au oiena i kiakiala, ana gara ararapoirina. §† Mark ana *Riwana Aiaina damona lamna wariaḡa ivi nevoai. Ma rava ḡelauna aiwai i notanotai nanare au verse 9 da 20 i girumi. Wei damonana weka ivi karei.*

ivi opuni. <sup>10</sup> Iesu, ana tauvotaḡotaḡo ivivi nuabola ma i toutou ma Mary i ḡeta da i parivere. <sup>11</sup> Ma Mary i parivere da Iesu i lawana me ma tauna matanei Iesu i inanai. Wate tau i eḡa itavi tumaḡanei.

#### Iesu, tauvotaḡotaḡo ruaḡa awari i eḡa

<sup>12</sup> Wei au murina Iesu inanana tapuna ma ana tauvotaḡotaḡo ruaḡa awari i eḡa; maranai tau i nena au melagai. <sup>13</sup> Tau i nae me ma tauvotaḡotaḡo ḡelaui ivi eḡei. Wate tau nanare eḡa itavi tumaḡanei.

#### Iesu Tau 11 awari i eḡa

<sup>14</sup> Muriai tau 11 i amam ma Iesu awarii i eḡa. Ma i eni au baina tau orai i bado ma eḡa itavi tumaḡana maranai rava, tau i riwei da Tauna ivo mairi me.

<sup>15</sup> Iesu, tau i riwei, "Ona nae dobu au anapuna. Ma

God *Riwana Aiaina* ona jime rava anapuni awarii.

<sup>16</sup> Aiai da ivi tumaḡana ma i babataito; tauna ina lawana. Ma aiai da eḡa *itavi tumaḡana* ina kovoḡi. <sup>17</sup> Ma tau aiavo da ivi tumaḡana, rewapana ina verei da *kaua babai* ina kauai. Ma arua-apoapoe inavi opuni ma pona tapunei ina babani. <sup>18</sup> Tau, mota uraiei ina vaia ma waiawa ina uma ma eḡa ina rau-putei. Ma urai doridoriai au kolai ina terei ma ina lawana."

#### God, Iesu i ḡaiei au Mara

<sup>19</sup> Bada Iesu, awari i babani vorovei. Ma tauna i ḡaiei au mara ma God au oiena i kiala. <sup>20</sup> *Tauvotaḡotaḡo* i opu ma dobu au anapuna i rarau-gugula. Ma Bada, tau ivo agui ma kaua babai i kaukauei da Tauvotaḡotaḡo aiwai i bababaniei ivo vairewapani.